

بودور، كۆكلنميشم سارى سيم اوسته
گۆرهك قيسمتميز نه اولاجاقدى.
اوره ييم حك اولوب وراقلار اوسته
اونى گۆز لر ينيز اوخوياجاقدى.

مضراب بارماغيني ز وراقلا ياراق
تئل-تئل دوشونجه مى دانيشدير اچاق.
منيم اوره ييمدن سيزين اوره يه
بلكه ده بو كتاب كۆرپو اولاجاق.

بودا بئله ناغيلدى

ميانالى عليرضا

سرشناسه	:	میانالی، علیرضا، ۱۳۳۵ -
عنوان و نام پدیدآور	:	بودا بئله ناغیلدی / میانالی علیرضا.
مشخصات نشر	:	تهران: کاروان ایرانگردان، ۱۴۰۳.
مشخصات ظاهری	:	۱۷۶ ص؛ ۱۴/۵×۲۱/۵ س.م.
شابک	:	۹۷۸-۶۲۲-۹۳۳۲۸-۲-۵
وضعیت فهرست نویسی	:	فیپا
یادداشت	:	زبان: ترکی.
موضوع	:	شعر ترکی آذربایجانی -- ایران -- قرن ۱۴ Azerbaijani poetry -- Iran -- 20th century
رده بندی کنگره	:	PL۳۱۴
رده بندی دیویی	:	۳۶۱۱/۸۹۴
شماره کتابشناسی ملی	:	۹۳۱۷۴۶۷
اطلاعات رکورد کتابشناسی	:	فیپا



نام کتاب	<input type="checkbox"/>	بودا بئله ناغیلدی
مؤلف	<input type="checkbox"/>	میانالی علیرضا
تایپ و صفحه آرایي	<input type="checkbox"/>	افسانه ابراهیم زاده
شابک	<input type="checkbox"/>	۹۷۸-۶۲۲-۹۳۳۲۸-۲-۵
سال چاپ	<input type="checkbox"/>	۱۴۰۳

حق چاپ برای ناشر و مؤلف محفوظ است.

ارتباط با ناشر: ۰۹۱۴۶۴۶۳۲۷۲

ایپینده کیلر

۷ *باش سۆز = ارشد نظری

قایغی نوتلاری

۱۵..... *اتلیم، دلییم، شعریم

۱۶..... *هله ... هله دو یون لیرین پوئوی باغلی

۱۷ * ... اینیمه سن مندن ای دوست

۱۹ * ... تکلله نیب، تکلله نیب، تک-تک اولموشوق

۲۱ * ... اولوم ماقدری ماقران کهلر

۲۵ * ... ائل-اویا سۆزونون بازاری اوجوز

۲۶ * ساری قوملی ساعیله نغمه

۲۷ * باهارا آلیشیق

۲۸ * جنایتدن دوغولموشلار

۲۹ * ۲۹ بعمن

۳۲ * کیم دیر کناهلکار

۳۴ * دنیاین نه وئییته

۳۵ * دره قویاغیندان قالفیر اویا داغ

۳۶ * بوگوش سفری

۳۷ * هر شئی واشتی کوزلر، وافدا امکانی

۴۰ * دنیامیز

۴۱ * یاششی کی

۴۴ * دوستلا دوشمن آراسیندا

۴۵ * ... باتیر کونش

۴۶ * ... تک قول آدامدا آدامدی

۴۷ * حیات یوللاری

۴۸ * ... بودا بلله

۴۹ * ... بیز سئودیک آران، داغی

۵۰ * يۇللار

سئوگى قانادىندا

۵۵ * سنى دوشونىن زامان

۵۶ * آى اوزه

۵۷ * بوگون ھىچ بىلمىرەم نە اوچون، نەرن

۵۹ * بوز قىبرى

۶۰ * كۆرەسن

۶۱ * ھەردن بىر يۇل آلىب قاطرەلەردن

۶۲ * كۆنلۈم ناغىل توشۇپور

۶۳ * بىلە بىلمە

۶۴ * سەنە نە دىيىم، نە دىيىم

۶۵ * سەن دە تەك سەن، مەن دە تەك

۶۶ * بىر آتار بولغام، بىلگە بىلىرسەن

۶۷ * سەن يارىما دوشورسەن

۶۸ * يۇللار ھەمەن يۇللاردى

۶۹ * ياغىش ھاۋاسى

۷۰ * سەندە مەنەم كىمى سەن

۷۲ * مەن بىر بلا كۆرۈپ بلالى باشىم

۷۳ * قىز ساقىلىندە بىر يۈۋا قوردوم

۷۴ * كۈل كىلەم، كۈل دەمەدەم

غەربتە

۷۷ * غەربتە

۷۹ * ھەردن قىلگىرە شىب دوشونورەم كى

۸۱ * ناغىلىرى ھەلە

۸۲ * بو يارالى كۆنلۈمۈن

۸۳ * تۈكۈندى

۸۴ * ونگوۋئەردن آيىق مەكتۈپ

۸۹ * ھاۋا تۈتۈلۈپ يامان

۹۰ * دەيشە بىك بو ھاۋا

۹۱ * او باھار قىسلى كىتلىك ايللەم

۹۴ * بورا باكىدى

- ۹۵ ... شېۋەسىز پۇخ شىۋىن دانىشمىشىق بىز
- ۹۶ ... كۈنلۈمە مەلەم او سئودالى آنلار
- ۹۷ ... ھارا كىڭىر
- ۹۸ ... ھاپاندى باشىمدان بىر خېكىر كىڭىر
- ۱۰۰ ... آتامىن دىئاسىنا، آتامىن لايلاسىنا
- ۱۰۱ ... كوكلكر اوڭقور يىتە
- ۱۰۲ ... يىتە دە يورد يىرى يۇڭما كىرىب
- ۱۰۴ ... سەھف كۆرۈنۈر، غىب كۆرۈنمۈر
- ۱۰۷ ... يۇل

دوشوندى سىزى، دوپاندا سىزى

- ۱۱۱ ... داغلار بىن دېرۋەدە آغاران قارى
- ۱۱۲ ... ھىچ كىس بىلمە يەك مەن ايتىرەنى
- ۱۱۴ ... ھاشم تىرلان بىن ۶۵ ياشىنا
- ۱۱۵ ... نىبە يازىم مەن؟!
- ۱۱۷ ... دافىلى دۇنياما قىرم قويموسان
- ۱۱۸ ... آتامىن قەبىر داشى يازىس
- ۱۱۹ ... آناما لايلا
- ۱۲۰ ... دوققوز يوز اون بىر

اۋزوملە اۋزوم

- ۱۲۷ ... ھايات يۇللارى نىن دۇلايلارىندا
- ۱۲۹ ... دنيا دلى ميدانى
- ۱۳۰ ... كۈنلۈمە صەبىت
- ۱۳۱ ... قىز سامىلىندە
- ۱۳۲ ... ايسىتەرەم
- ۱۳۳ ... قىز دىئە آڧىرام
- ۱۳۵ ... پايىزى مەس ائىرىب دوشونى كىمى
- ۱۳۶ ... ناغىل اولماق ايسىتەرەم
- ۱۳۸ ... بودا بىلە ناغىلدى
- ۱۳۹ ... يىتە دە بىر خېكىر كىب باشىما
- ۱۴۰ ... سوزكون بىر باغىشا تامازى كىمى
- ۱۴۲ ... امىر رۇيا دىيىل

- ۱۴۳ * ایناندا دنیایا
- ۱۴۵ * زورلا یازاندا
- ۱۴۶ * اینانماق آن چتین
- ۱۴۷ * کؤنلوم
- ۱۴۸ * قار یاغری داغلارا
- ۱۴۹ * هر نه ذره-ذره یتیشمه دیسه
- ۱۵۰ * ساپیما دوشدی دن
- ۱۵۱ * بیر دؤست اوياغی نین کؤزوندن اومدوم
- ۱۵۲ * کؤنلوم امید شهوری دی

اوشاقلار باغچاسیندا

- ۱۵۷ * قارا کونون عؤمری آز اولار
- ۱۵۹ * صلحه سس وئرین
- ۱۶۰ * کؤزه ل قیز
- ۱۶۱ * صلح ایسته بیر اوشاقلار
- ۱۶۴ * سئوال
- ۱۶۵ * واقئین قیمتی
- ۱۶۶ * مستان پیشیک
- ۱۶۸ * طبیعتین قوینونا سفر
- ۱۷۰ * تنبل اوغلان
- ۱۷۱ * بیر پیشی ییم وار
- ۱۷۲ * اوئومولارا مراجعت
- ۱۷۳ * سون سؤز = سعیر قافلانا مصابه

پايىز آغاجىنىن آل چاتمازىندا
 قوشلار يئرىكلەين تورشا شىرىندى
 ساحىلە سۆيكنمىش بىر دَنبىز كىمى
 قىزىل آلايلاردا درىن-درىندى
 قىشىن دۇداغىندا بىر اىستى اوجاق
 يايىن لهجەسىندە سىرىن-سىرىندى.

حۆرمەتلى اۇخوجولار

سۆز صحبت شاعىر مىنانالى علىرضادان دىر. بو گۆزل انسان كى، ادىياتىمىزىن تانىمىش بىر شاعىرىدى، اۇنۇن اورەك سۆزلىرىنە باش سۆز يازماق چۇخ چىتىندى. نىيە؟ بونا گۆرەكى، او عۆمرونون آن هيجانلى گنجلىك دۇورونى آنا تورپاغىندا كئچىرىپ و بورانىن آجىناجالقى و شىرىن گونلىرىنى آتيلە، سومويويلە تجروبه ائدىب و سۇنرا دۇغما وطينىدن ائشىكده تورلى-تورلى انسان جمعيتلىرلە، فرقىلى فرهنگلە، دئوران سوروب كى، بو اوزون مدتلى دونيا گۆروشى و باخىشى اۇندان يىتتىگىن و دوھالى بىر انسان يارادىب كى، اۇنۇن حاققىندا بو دانىلماز گىرچكلردن واز كئچمك اولماز.

منىم مىنانالى علىرضايلا ياخىندان دۇست كىمى تانىشلىغىمدان آن آزى بىر ۵۰ ايل كئچىر و بو ياخىنلىق دَيرىلە دئە بىلرم كى، من اۇنۇن نە تىكجە دوشونرى و شعىر دونياسىن، بلكە اورەيه ياتان اۇزەللىكلرىنى دە ياخشى تانىيرام. بۇيوك بابالارىمىز دئمشىكن: اوت كۆكى، اوستە بىتر.

دئمك علىرضا ايكى زحمتكش و مهربان انساندان (آتا آناسى نصىر عمى و بۇيوك ننه خالادان) تربىه گۆتورموش كى، محللەدە هئىچ زامان او ايكى انساندان بىر كىمسە اىنجىمەدى و بوتون تانىشلار، قۇھوم قونشولار اۇنلارا آرک ائدر، ائلە كى، قاپىلارى ھامىنىن اوزونە آچىغىدى و ساىىن نادر مظفرى، علىرضانىن قارداشى آذربايجان موغاماتىندا شەرىمىزىن اىلكىن كامانچا اوستالارىنداندى، ھمن عائىلەدە چىچكلەنىپ و

موغاماتیمیزا قۇلوقلار ائیدیدیر.

علیرضا، دوسلوق آرا باریش نمونه سی دیر و کوسولو آداملارین آراسیندا معنوی کۆرپی کیمی آرخاینلیق گۆنجه یام-یاراگی اولراق مَحَبت و صمیمیت داشییر. او همشه دَئیر :

«فرقیلی دوشونجه لر اساسیندا، یوللار اوز به اوز گلنده، آیریلیق یوخ بلکه هامان نقطه دن، اوچونجی شریکلی یول باشلانار.»

او بوتون انسانلاری اولدوقلاری کیمی رسمیتنه تانیبار و همشه منم-منملیکلردن اوزاق دوروب، اوزونون سهو و یانلیشلارینی دا صداقتله نغده چکیب قینایار و هامیلاردان ایسترکی، باریش یولونا قول قویسونلار. هدفیمیز بو عمومی سۆزلردن شعیر پارچالارینداکی اؤرنکلره یول آچماقدیر و دئیکلریمیزه یتتلی اؤرنکلر سونماقدیر. لطفًا باخین شاعیرین هامیدان قاباق اؤزوندن تنقیدینه :

هئچ نه گئتمیر آخی اؤز قایداسیلا
 هارداسا عیب وار نقصان وار یقین
 هامی باش قاچیریر ائله دییندن
 بیرى من عیبیمین تاپمیرام بیرین.

دونیدان گۆروب گۆتورموش و معنوی محصوللارا مالک اولان شاعیر، اؤزوموزی همشه بو دورومدا گۆرور :

چکیریک هله ده اؤز ایچیمیزده
 رویادا یاشاماق اولوب عیبیمیز
 دیشاردان اؤزگه نی گولدورن یئرده
 ایچدن اؤزوموزی اولدوروروک بیز.

شاعیر، بوتون انسانلارا دنیامیز شعرینده بئله بیر دوشونجه اؤنه ریر :

هر سۆزه یول آچماساق
 بوش-بوش آشیب داشماساق
 آرتیق کوبودلاشماساق
 گۆزله شر دونیامیز.

میانالی علیرضا چوْخ درین مفهولاری چوْخ ساده و یوموشاق دیلی ایله دئییر و هر نه یی اؤزوموزدن باشلاماق ایسته ییر. هر نَدن آرتیق منم-منملیکلرین مقابلینده دورور :

هامی منم دئییر، هامی من دئییر
واللاهِ بیز دئینده منه تن دئییر
سهوینی قانانا نه دئسن دئییر
یاخشی کی، صاباحا قالما یا جاییق.

منم-منملیک داشییان فرقیلی یوللاری چوْخ ساده لیکله بئله وورغولاییر :

یوللار

یوللار

یوللار

فیکیر ایشله دیکجه، گوْز ایشله دیکجه
نه قدر گئدیرسن قورتارمیر اونلار
یول وارکی، انسانی ساپاند داشی تک
اوجا ذیروه لردن دره یه توللار
یول دا وار انسانی درین دره دن
سعادت قوشی تک ذیروه یه یوللار.

دوسلوق شرفینه اوره بینده چوْخ احتراملار بسله ییر :

کیم کی، اولدی دؤستدا کؤمک بیرینجی
او دؤستی سان گوهر کیمی بیر اینجی
سن نانجیب بو سؤزومدن لاپ اینجی
نجا بتلی گره ک گوْیدن آی اوزه.

شاعیر آیریلیقلاردان نه لر چکمیش :

داغلار همن داغلاردی

دره لی، تپه لی دی

هله ده گزمه لی دی

دی گل کی، اوندای بیز

توتاق کی، هر بیریمیز
نه سن اوسان، نه من او.

میانالی علیرضا اورهک آغریسینی غربت اولکدهده وطن حسرتیله بئله قلمه آلیر و دئییر :
هئچ بیر شئی وطن دادی وئرمیر.
هئچ نه بین داماقدا دادی داد اولمور
کیمسه نین نئیهسه آدی آد اولمور
آدی اولانلارین آدی یاد اولمور
غربتده بیر شئی یوخ وطن یئرینه.

شاعیر بو کتابیندا، صلح ایسته یه رک، دوسلوقلارا تام احتراملا برابر،
دوغما وطنیندن اوزاقدا آیریلیق آجیسینی اونودا بیلیمیر و آیین-شایینلی گنجلیسینی
غربتلرده سووماغینا حسرت آپاریر. آما دوغروسی نه چتین دیر وطنسیزلیک :
مطلق گوره جکسن آخی او یوللار
فَهله الی کیمی قبار-قباردی
هئچ نه یی هئچ یئره آپارماسا دا
منیم گنجلیسیم آلدی آپاردی.

دئمک شاعیر حتی باکی دا دا داریخیر و خیال آرزوسی، اؤز داغلارینین آته ییندن آخان
قیزیل اوزن چایینا دوغری قانادلانیر :
بورا باکی دی
قیزیل اوزن چایی یوخدی
زولال، تمیز آخار سولارینا قوشولاسان
روحونی تمیزله یه سن،
سسيله یویاسان
هله قیز قالالی قافلاتتی ایسته میرم
هله گؤم گؤی دؤشه ملی
سحرلی گئن دره لی
روح اوخشیایان بوز گوشونی دئمیرم.

شاعیر بوتون اثرلرینده او دوشونجه لر کی آیریلیقلارا سبب اولور، اولنلاردان بئزیر :

بیرینجی ایشیمیز سونا كئچیدی
 ائله اونا گۆره چاش-باش دوشموشوك
 باشدا اوزوموزله داعوا قورموشوق
 اوزوموز دوشمنین ایشین گۆرموشوك
 ائله اونا گۆره چاش-باش دوشموشوك.

آیریلیق حسرتلری قویمور شاعیرین اوزو گوله :

قویوب گلدییمدن اوردان ملتی
 بوشونا گزیرم بوردا حورمتی
 قاچیدی آغزیمین دادی، لذتی
 اودور کی، هئج منیم بیر اوزوم گولمز.

شاعیر اوزون وطن حسرتینی اؤز مهربان آتا، آناسینا اوز توتاراق بئله دئییر و اورهیی
 دولور :

آتامین دونیاسینا
 آنامین لایلاسینا
 یامان غریبسه میشم
 او یول قیراغینداکی
 او چشمه باشینداکی
 اود-اوجاغین توستوسی
 منه غریبسه یین تک
 او صحبتلر، او سۆزلر
 او جیغیرلار، او ایزلر
 منه غریبسه یین تک
 آتالی دونیام اوچون
 آنالی لایلام اوچون
 من ده غریبسه میشم.

یاخود باشقا بیر یئرده بئله یازیر :

يئنه ده يورد يئرى يوخوما گيريب
 آنالى گونلريم قايداجاقدى
 هاچاندى آغريدان اوره ييم آغليز
 آنام اوره ييمي اوووداجاقدى

شاعيرين دوغما يوردونا دۇنمە يى كۇنلوندن كئچيركى البت بونودا يئرینه يئتيرير :
 گاهدان قايتماغا قرار وئيريم
 منى چاغيرانيم او اود-اوجاقدى
 گۆره سن قايتسام منيم اوزومه
 ايندى نئچه قاپى آچيلاجاقدى.

بيليريككى، ميانالى عليرضانين انقلابدان سۇنرا نئچه-نئچه اثرلرى او جمله دن
 كيچيكليكده بۇيوكلوك؛ ياراتماق ياشاماقدى؛ بودا بير عۇموردى كيمي كيتابلارى
 ياييلىب آما بو شاعير و يازارين ده يرلى و باسيلمايان اثرلرى ده چۇخدىكى
 قيمتلنديرمه لي ديرلر و مدنيت تاريخيميزه بير مرجع و سند حساب اولاجاقلار.
 شاعيرين بير اۆزه لىيى ده شعيرلرينده اولان آخيجىلىق، آوروپا شعيرلريندن فايدالانما
 و آذربايجان دوغمالىغىنى قۇرۇماق دير.
 بير سۆزده آرتيرمالىيام كى، يئنى پست مۇدئرن آدييلا باشلايان يئنى شاعيرلريميزه بير
 تاپشيريقدى.
 سۆزلريمين سۇنودا شاعير ميانالى عليرضا جنابلارينا جان ساغليغى و اوزون عۇمور
 آرزولاييرام و باشقا اثرلرينين ده گونش اوزى گۆرمه سينين يولونى گۆزله ييرم،
 مندن بو قدر.

ارشىد نظرى

۱۴۰۲

قايغى

نوتلارى

تکله نیب، تکله نیب، تک-تک اولموشوق
گلین بیر بیرلشک گوره ک نه اولور.
گورشاددان آقان پای زولال آقانماز
داشدان داشا دهیب گلیب دورولور.

ائلىم، دىلىم، شعريم!

مندن چۇخ گوجلۇر گليب عرصه يه،
 مندن ضيالىلار گۇروب بو دنيا.
 مندن دردسيز گۇروب، غمسيز گۇروبدى
 مندن جفالىلار گۇروب بو دنيا.

مندن اراده لى، مندن شېهه لى،
 مندن صداقتلى، مندن تميز، دوز؛
 مندن جسارتلى، مندن بلکه لى،
 مندن صميمى ده اولۇبدى شكسيز...

دى گل كى، چۇخونون آدى، شهرتى،
 محدود بير دۇورودن چيخا بيلمه ييب.
 آخى دانيشديغى سۇزلىر، صحبت لىر
 دۇوروندن كناردا ائشيديلمه ييب.

مندن گئرى قالب اۇنلار يىن چۇخى؛
 آخى هئچ بير يىندن قالماييب بير ايز.
 ائلىم، دىلىم، شعريم وار اولونوزكى -
 اولسم ده سيز منى ياشادا جاقسيز.

هله دویونلرین چوخی باغلی دی؛
 هله ده یوللارین یاریسی قالیر.
 هله چوخی وارکی، گۆزی باغلی دی؛
 هله ده دوست دوستدان یارالار آلیر.
 قطعی سۆز دئمه یه تله سمه سن ده؛
 بو گونا نه سنده، نه ده کی، من ده.

جیغیر گۆرموشم کی، چوخ یولدان آیدین؛
 هله او جیغیردان چوخی خبرسیز.
 تپه گۆرموشم کی، داغان بهرلی
 دوشمن ده تاپیلیر دوستدان ضررسیز.

هله آچیلمامیش سیردی بو دنیا؛
 اونون بیر قاتیندا یاشاییریق بیز.
 باشقا قاتلارینی دوشونمک اوچون
 دَرینه ایشله میر فیکیرلریمیز.

هله تاپمامیشام بوتونلویونی؛
 توش گلسم ده آرتیق سئوینجه، دَرده.
 آنجاق بودور منیم دنیا گۆروشوم :
 فیکیر سؤیله ینده، فیکیر دئنده،
 قطعی حکمه بئله تله سمه سن ده،
 بو گونا هم سنده، هم ده کی منده.

اينجيمه سن مندن اي دوست!
 دئمه سنه چاتانميرام.
 والللاه سنه چاتماق اوچون،
 گئجه نى ده ياتانميرام.

سحر- آخشام داوادا يام؛
 اؤز- اؤزومله ايچيمده من.
 سن ده بير باخ گؤر گئديره م
 هانسى اؤلچى- بيچيمده من.

اينامىنى وئرمه آلدن!
 اوزات منه دوست اينى.
 تك سن كى يوخ
 چوخى سئوير،
 آچىق باخسان اؤز ائلىنى.

بير بالا جا درين باخسان،
 گؤره جكسن اوزوندى يول.
 بئله يولى داشيماغا،
 بير بالا جا تمكىنلى اول.

هر گلنه يازما گوناھ؛
بیر گون گلر تک اولارسان.
تک اوزونه تميز دئمه؛
لاپ اوزونله تک قالارسان.

چوخى کیمی سن ده واللہ
هرنه اوچون واس-واسی سان.
اصیل ایشین یئرده قالیب،
بوش یئره چوخ زور باسیسان.

کیم گوروب کی، سن گوره سن؟!
تک الدن کی سس اولانماز.
هر نقصانا يازما گوناھ،
تمکینلی اول سن ده بیر آز.

اینامینی وئرمه الدن؛
اوزات منه دوست الینی.
تک سن کی یوخ
چوخى سئویر
آچیق باخسان اوز ائلینی.

تكله نيب، تكله نيب، تكله نيب، تك-تك اولموشوق؛
 گلين بير بيرله شك گۆرهك نه اولور.
 گورشاددان آخان چاي زولال آخانماز؛
 داشدان داشا ده ييب گليب دورولور.

بولانيق آخيري، دورولماميشيق.
 بيز هله يئنى دن قورولماميشيق.
 زامان ده ييشسه ده، دى گل كى، والله
 دونن كى، مجراعدان يورولماميشيق.

گلين او مجراعدان قوپارين منى؛
 آزاد انسان كيمي بير نفس آليم.
 قوشون جرگه نيزه آپارين منى؛
 چيخيم قفسيمدن بير قانادلانيم.

گلين هئچ اولماسا دورولدون منى؛
 بولانيق آخماقدان بئزميشم داها.
 تكله نيب؛ تكله نيب، تك اولدوغومدان،
 اوزومى آز قالا اوزموشم داها.

آخى نه دئبيرم آتام اينانمير.
 والله نه دئبيرم آنام اينانمير.
 آن ياخين قوْوموم خالام اينانمير.
 خالام دا بيريانا، بالام اينانمير.

گلين ساچلاريمى تومارلاماين،
 گلين، دؤيه-دؤيه دورولدون منى.
 گلين سيز هئج منه هايان اولماين؛
 گلين، سؤيه-سؤيه دورولدون منى.

تكى تكلى ييمدن منى چيخاردين؛
 گلين، قاتين منى اؤز جرگه نيزه.
 گلين، گله جه يه آپارين منى؛
 بير اولماق گرە كدى وْطنيميزه.

وْطن ده بؤيوكدى، مَلت ده بؤيوك!
 بو بؤيوكلوكلرين بيز ذرّه سى ييك.
 بيرله شيب، بير اولساق، ذرّه لر دئيل،
 اينانين شهبه سيز اولاريق بؤيوك.

گلين آل بير اولاق، چيخاق بو يولا!
 گلين قدرين بيلك اوْتن هر آنين.
 تكجه سؤزده دئيل، عزيز ساخلاياق
 فيكرين، دوشونجه سين هر بير انسانين.

اۆلوم حاقدى، حاقدان گەلەر

اىل سۆزى

دادى باشقادى،

بوياسى باشقا؛

زامانى باشقادى اۆلومون.

بيريىنە گلەر واختى - واختيندا.

عۆمرونى گۆزەل ياشادى دئيرلەر؛

اۆلومى دە گۆزەل يازيلميشيميش باختيندا.

بيريىنە گلەر زامانسىز، واقتسىز.

گلەر دۆرد نالا چاپان كيمي،

آمانسىز گلەر.

واختى بيلمەين كيمي،

زامانسىز گلەر.

اۆلومى واختسىز اۆلدى دئيرلەر بو يازيغين

یاشاماقدان نه اوموشدی کی، بو باختسیز؟
 عۆمری سانکی قیریق تئله بندایمیش...
 پوف دئسن اوچاجاق یئله بندایمیش...
 ایمانی باشقادی،
 اینامی باشقا؛
 آمانی باشقادی اولومون.
 بیرینه گلر یاشاماقدان بئزنده.
 حیاتدان آل اوزنده.
 بیرینه گلر ایکی ال ده بۇرچ دیله ییب
 دنیادان دۇرد آل له توتاندا، یاپیشاندا.
 بیرینه گلر توکنمز بیلمه یین،
 جاوابی گۆزله نیلمه یین
 اؤز-اوؤزونه وئردی یی سئواللاردان بئزنده،
 یؤرولاندا.
 بیرینه گلر عادی گولوش کیمی؛
 گلر معناسی اولمایان گؤروش کیمی.
 گلر، تام اؤزی کیمی؛_
 عزراییل کیمی.
 سسی باشقادی،
 نَفَسی باشقا؛
 هوسی باشقادی اولومون.
 بیر آیینده زهری،
 بیر آیینده بالی وار.
 هله گۆرکی، نه قدر

ھىچ دە ھىچ بېلىنمەين
 اۋزى كىمى گۈزلەنېلمەين
 قالما-قالى وار.
 نە قۇجا بېلر، نە جاوان؛
 سوت قۇخولى كۇرپەنن دە گلر سۇراغينا؛
 قۇل بوداغى پۇھرەلەنن
 قيريلماق بېلمەين
 چنار كىمى جاواننن دا سۇراغين آلار.
 انسان اولسا_
 اۋزى دە اۋز ايشينە مات قالار.
 بىكلەير؛
 كسر يانينى بعضا
 دۇخسانى آشان،
 آلدن دوشن قۇجاي ديمز
 دنيادان قاچماغا،
 يالوارماغا قدر دوشسە دە بىكلەير، ديمز.
 ياتاغا دوشر ايمكلەير، ديمز.
 اداسى باشقادى،
 قاداسى باشقا؛
 صداسى باشقادى اولومون.
 دوز يۇلدا، دوزندە
 آراباسيلا گئندە
 سئودى يى قيزا اۋزونى گۇستەرنەندە،
 مانوور وئرنەندە

يىرمى ياشلى آدا بازىن آلار جانىنى باخماز!

آناسى آغلایار، آغلار قالار، باخماز!

گئجه گوندوز سىزلایار؛

سىزلار قالار باخماز.

دادى باشقادی،

بوْياسى باشقا؛

زامانى باشقادی اوْلمون!

ئىل - اوبۇ سۆزونون بازارى اوجوز؛
 خارجى سۆزلىرىن بازارى باھا.
 بىردە كى، تزه سۆز، تزه مُد، بلكه
 خارجى سۆزودى يامسىلاماغا.

« يىر برك اولسا، اؤكوز، اؤكوزدن گؤرر...» -
 آتالار سۆزىدى، كۆهنه ليك سۆزى.
 بىردە كى، يىرى كى، اؤكوز سورمه بىر،
 نه لازم آتالار سۆزى داي دوزى؟
 آتالار سۆزىدى كۆهنه ليك سۆزى.

خارجى سۆزىدى تزه مُد... آخى
 خارجى سۆزلىرىن بازارى باھا.
 كهنه ليك اولسا دا اينانلار يىق
 ئىل - اوبا سۆزونى بىز قوروماغا.

سارى قوملى ساحيله نغمه

سَن سارى قوملى ساحيل،
 مَن دَنيزدن بير داملا...
 اوره ييمي آچيرام
 سَنه مين بير سئواللا؛
 سَن توفانلى دَنيزى
 سينه ن اوسته اُوخشاين؛
 مَن اُونون بير ذَرهسى
 اُونون قوينوندا جوشان.
 سَن شيپ-شيرين سولارين،
 يادا شوران سولارين
 ياتاغيسان، بيليره م؛
 مَن نه بيليم هانسىيام -
 شيرينم، يا آجىيام؟
 فقط بونى بيليرم،
 جوشوب -داشان دَنيزين،
 داملاسى نين بيرى يم.
 اى سارى قوملى ساحيل،
 اويرت، منه سَن اويرت -
 حليملى ييني اويرت؛
 اويرت منه، سَن اويرت -
 متينلى ييني اويرت.
 اونسي تيني اويرت،
 قودسي تيني اويرت.

باھارا آلقىش

بودا پاييز؛
 بودا اوشوين ياغيشلى ھاوالار.
 بودا چشمه لردن آخىب گلن
 تير-تير آسن زولال سولار.
 بودا سازاغا بورونموش كولك؛
 بودا من!
 داھا نەدن دئيم، نەدن؟
 ياغير قارغيش؛
 گليرسە دە قارا قيش
 گلن باھارا آلقىش!

جنایتدن دُوْغولموشلار!

اوبأ دئییب، ائل دئییلر،
شیرین-شیرین دیل دئییلر،
وْطن اوچون اؤل دئییلر.
جسارتدن دُوْغولموشلار.

خوش آرزولی، خوش دیلکلر،
هله ایشلر گوره جکلر؛
پاک قلبیلی، پاک اوره کلر
صداقتدن دُوْغولموشلار.

دوشونمه یین باخار کوردی
صَف چکسه ده اوردی-اوردی
گورن هانسی گوربا-گوردی
ردالتدن دُوْغولموشلار.

مین فتنه یه، فئله دوشر؛
بودا دیلدن-دیله دوشر؛
زهلی کیمی ائله دوشر
خیانتدن دُوْغولموشلار.

بو تضادلار نه دن دُوْغدی؟-
دویان قلبه سانکی اوْخدی.
بو گون وارسا صاباح یُوْخدی
جنایتدن دُوْغولموشلار!

۲۹ بھمن

گلدی!...

گلدی نئجه ایللردن بری گلدی یی کیمی.

یاد کیمی دئیل،

گلدی یادلاشان تانیش کیمی.

اوزاقلاشان دۇست کیمی.

نه سؤگی بویاسیندا گئینمیشدی،

نه مَحبتدن چَلنگ هؤرموشدی.

آزاجیق گؤروشونده

بیر آزجیق گولوشونده

بیر آزدا یئریشینده ده ییشمیشدی.

نه بیسه چاتیشمایانلار کیمی،

یوخودان دیکسینیب اویانانلار کیمی

توکلری اورپشمیشدی.

قایساق باغلایان یاراسی

بوایل بیر آز شیشمیشدی.

ائله بیل خیالیندا یاتان، اویویان نهسه

بوایل یادینا دوشموشدی.

بیر آز پؤرتموشدی...

گلدی بوایل ۲۴ یاشیندا.

نئچه ایللردن بَری
 بیر ی بیرینه بنزر گونلر کیمی گلدی؛
 آچیلمايان دویونلر کیمی گلدی.
 نه یاراما ملحم ائله دی؛
 نه یانغیما سو چيله دی؛
 نه دَر دیمه دَر مان گتیردی.
 گلدی نسبتا دیشین کیمی
 بیر آز سیلکیندی،
 بیر آز دیکسیندی...
 مَن اوْنی اؤزله بیردیم
 بیرینجی گلدییی کیمی.
 مَن اوْنی گؤزله بیردیم...
 بو ایلین،
 بو فصلین،
 بو آیین ۲۹-زوندا.
 مَن اوْنی ایزله بیردیم
 سسی کؤنول آچان کیمی.
 نَفسی جان کیمی!...
 دی گل او گلدی
 سس سیز-سه میر سیز.
 گتدی ایز سیز-له پیر سیز.
 یاشینین اوستونه
 یاش آرتیرماغا گتدی.
 بلکه ده گونی دئیل

آى دئييل

فصلى دئييل.

ايلي ۲۹-زا چاتديرماغا گتدى؛

ياشى ۲۹-زا چاتديرماغا گتدى...

فيكرىم يوين آتى نين باسيب اوزنگيسيني

دارتيب جلووون گتدير.

گتدير قارابا-قارا.

گتدير داليسينجا،

گتدير اونون قاراسينجا...

كونلوم داينان دئييل؛

دايانمادان تله سير.

باشقا نهسه دولاشير،

كونلومون يادداشيندا.

باشقا نهسه دولاشير،

هر حس سى نين باشيندا.

يئير ايچدن اوزونى.

دويونله ييب سوزونى،

آن اوزاغى دئيه جك

۲۹ بهمين

او ۲۵ ياشيندا.

كىم دىر گوناھكار؟

بىر چىخىش يولونون تامارزىسى يام،
 ھاچاندى يول چكىر اورەيىم، گۆزوم.
 داھا توکەنىبدى دۆزوموم منىم؛
 چوخداندى گزىرەم دۆزومە دۆزوم.

گىلىئى-گوزار يئرى يوخومدى منىم؛
 اۆزوم ائىلەمىشم، نە ائىلەمىشم.
 ھردن سۇروشورام اۆزومدن اۆزوم:
 گوناھىم نە اولوب، من نئىلەمىشم؟

ھىچ نە گىتتىمىر آخى اۆز قايداسىلا؛
 ھارداسا عىب وار، نقصان وار يقين.
 ھامى باش قاچىرىر ائلەدىيىندن
 بىرى من؛ عىبىمىن تاپمىرام بىرىن.

بئله گئتسه هله بترلشه جك،
 دوشه جك بىر داها دويونونه دويون.
 دئبيره م: ايندى كى، بئله گليب دى
 اوره بيم، سَن بىر آز گوناھلا اؤيون.

گوناھين وارديسا چيخيش يولى وار
 يوخسا نه آختاريب، نه يى گزيره م.
 گوناھكارام بلى، گوناھكارام مَن؛
 تسليم واردى كى، بئله دؤزوره م...

سَن ده گل اوخوجوم قيناما مَنى،
 سن ده گوناھكارسان، واللہ گوناھكار.
 آلساق بوينوموزا نقصانيميزى
 دنيانى دوز يولا قايتارماق اولار.

يوخسا نه آختاريب، نه يى گزيريك؟...
 ائله اولسا بىر آز اميد يئرى وار.
 سَن مَنى، من سنى قيناماياق چوخ!-
 سَنده گوناھكارسان، منده گوناھكار.

دنيانين نه وئجينه

اۋز اۋزونده ايتسن سن،
 اۋزون اوچون اۋتسن سن،
 بئله كۆچۈب گئتسن سن،
 دنيانين نه وئجينه.

نه باجيندى، نه آنان؛
 نه عميندى، نه خالان.
 يۇخونسا يادا سالان،
 دنيانين نه وئجينه.

عۇمرون قدرين بيلمەسن،
 كيشى كيمي اۋلمەسن،
 بىر گۆز ياشى سيلمەسن،
 دنيانين نه وئجينه.

مئتله اولسان اكر،
 عۇمرون تاپار بىر دىر.
 ائله اولسان كيم دىر:
 دنيانين نه وئجينه!

دره قۇجاغىندان قالخىر اوجا داغ

دره يه اوجا داغ درينلىك وئىر؛
 داغى درين دره اوجا گۇستىرر.
 قىشىن چىللەسىندە قار ياغا-ياغا،
 درەدن حرارت چەكىلر داغا.
 اوجا داغ باشلاسا بئله ايش گۆرە،
 يايىدا سَرىنلىك وئىر دَرە يە.
 ازەلدن بئله دىر،...

بىلمىرم نىيە

اۆزۈمدە بئله يم لاپ بىلە-بىلە.
 ھامى كۆنۈل وئىر اوجا ذىروە يە،
 باخىر سايمازيانا درين درە يە...
 ايشىم يۇخ بو نىيە بئله دى، آنجاق
 دره قۇجاغىندان قالخىر اوجا داغ

بوزگوش سَفَری

بو نقطه ساری گول منطقه سیدی؛
 نه قدر ایشله بیر گوژ ساری گولدی.
 ائله بیل بوزگوشون بو آی، بو فصیل،
 داغچی قوناغینا، تام واری، گولدی.

بوردا بیرجه قاریش بوش یئر تاپیلماز،
 گرەک آياقلاييب کئچه سن گولی.
 داغچی تله سمه یوخ کئچمه لیسن دوز
 کچه سن ازه سن نئجه سن گولی

من ده سیزین کیمی گیرده ایم بو گون؛
 دی گل! -سسلرینیز قولقلاریمدا.
 اوره بیم سینهمده دؤیونمور، بوگون-
 اوره بیم چیرپینیر آياقلاریمدا.

هر شئى واختى گۆزلىر، واخت دا امكانى

زامان اۆز حۆكمونى وئىرير نئيلهسن.
 زىل قارا ساچلارا بىر-بىر دَن دوشور.
 چالاغاندان ايتى گۆرن گۆزلىره
 بۆز بوران ساياغى دومان، چَن دوشور.

اۇندا دوشونورسن، اۇندا قانىرسان
 سنده بو دنيادا بئش گون قوناقسان.
 قبول ائتمسن ده، ائدتمسن ده
 آخىر بو عناددان يورولاجاقسان.

كىم دئمىش نئجه ده نه گۆزهل دئمىش:
 بىر چايدا بىر كره چىنمك اولورموش.
 هر ياشين اۆزونون اۆز كورسوسى وار.
 بىر يول هر كورسويه مېنمك اولورموش.

ايندى يانا-يانا دۇنوب باخيري
 اۆتن گونە، آيا، ايللره بير-بير.
 هفتهلر دالينجا هفتهلر گه لير
 بونون عكسى ده كى، اولان دئيلدير...

زامان دۇرد نالادى، چاپير دورمادان.
 دن دوشن ساچيميز دوم آغ اولوبدى.
 حؤكمونى داغ بويدا بيلديكلريميز
 ايندى كؤكسوموزده بير داغ اولوبدى.

چكيريك ده هله اؤز ايچيميزده.
 رۇيادا ياشاماق اولوب عئيميز.
 ديشاردان اؤزگه نى گولدورن يئرده
 ايچدن اؤزوموزى اولدوروروك بيز.

هاردا داياناجاق بو گئديش هاردا؟
 هاردا دۇنه جه يك كيملى بيميزه؟
 بو كهنه خسته ليك سۇنا چاتارسا
 ذوال اولماياجاق بيرلى بيميزه...

زامان اؤز حؤكمونى وئير، دى گل كى،
 بو كرە دئيه سن يئنى حؤكمى وار.
 بيزيم بيرلى بيميز يارانا بيلسه
 زاماندا ديشيب بيز دئين اولار

" ھەر شئى واختى گۆزلىر، واختدا امكانى!"

آتالار سۆزودى بو دور، بو اينجى.

گلىن اۆزوموزه قايداق، گلىن -

يئىدىن كشف ائدك ايتمىش بو گنجى!

يۇخسا نه قويموشوق، نه آختاريريق!؟

آدىمىز بۇيوكدى، اۆزوموز جىليز.

يولدايىق ھامىمىز، آما آيرى يىق.

بارى قۇى اولماسين سۆزوموز جىليز.

ھاردا داياناجاق بو گئديش، ھاردا؟

ھاردا دۇنەجەيىك كىملى يىمىزە؟

بو كھنە خستەلىك سۇنا چاتارسا

ذاوال اولماياجاق بىرلى يىمىزە...

دنیا میز

انسان کیمی یاشاساق،

گۆزه لشر دنیا میز.

پاک آرزولار داشی ساق،

گۆزه لشر دنیا میز.

یاتسا فتنه، کلکلر،

جوشار آرزو-دی کلکلر.

جیلانسا اوره کلر،

گۆزه لشر دنیا میز.

کۆمک اولساق دَر دلییه،

یوللار دوشمز سَر تلی یه.

جیغیر آچساق مَر دلی یه،

گۆزه لشر دنیا میز.

هر سۆزه یول آچماساق،

بوْش-بوْش آشیب داشماساق،

آرتیق کوبودلا شماساق،

گۆزه لشر دنیا میز.

ياخشى كى...

بو يۇللار هارداسا يورولاجاقدى؛
 بولانيب-بولانيب دورولاجاقدى.
 او زامان هاميسى بير اولاجاقدى؛
 ياخشى كى، بيز اۇندا اولماياجايق؛
 ياخشى كى، او دؤوره قالماياجايق.

آخى نه ييميز وار وئرك صاباحا!؟
 آخى نه ييميز وار دئيك صاباحا!؟
 هانى بير گؤرونتى گرهك صاباحا!؟
 ياخشى كى، صاباحا قالماياجايق؛
 ياخشى كى، بيز اۇندا اولماياجايق.

هاپ-گوپلار ايچينده قاينايانلاريق.
 اؤزگه هاواسينا اوينايانلاريق.
 وطن، ملت نهدى قانمايانلاريق؛
 ياخشى كى، صاباحا قالماياجايق؛
 ياخشى كى، بيز اۇندا اولماياجايق.

هانى بير سؤزوموز، بيرليك سؤزوموز؟
 گؤرمور يا گؤرنمير گؤرن گؤزوموز؟
 ايتيب لپيريميز، باتيب ايزيميز
 ياخشى كى، صاباحا قالماياجايق؛
 ياخشى كى، بيز اۇندا اولماياجايق.

قيلنجى، قالخانى يوك ائتميشيك بيز .
 دوشمن گئدن يولدا يول گئتميشيك بيز .
 بو گون يوخ، دونن ده لاپ ايتميشيك بيز؛
 ياخشى كى، صاباها قالماياجاييق؛
 ياخشى كى، بيز اوندا اولماياجاييق .

خانلىقلار دؤوريدى دؤوريميز، نه دير؟
 بو مسلك، بو اينام هاردان گلمه دير؟
 ايشچى يوخ، هاميميز اولموشوق صدير!
 ياخشى كى، صاباها قالماياجاييق؛
 ياخشى كى، بيز اوندا اولماياجاييق .

ملته باشچى يوخ، ايشچى گره كدى .
 ايش بيلن باشچيميز سئچيله جكدى .
 بو ايشده هاجانسا گوروله جكدى؛
 ياخشى كى، او گونه قالماياجاييق؛
 ياخشى كى، بيز اوندا اولماياجاييق .

بيردن قاريشديريب ايريني دوزى،
 بيردن آلدانارلار سئچرلر بيزى .
 قويون بيرده دئيم دئدى بيم سؤزى،
 ياخشى كى، صاباها قالماياجاييق؛
 ياخشى كى، بيز اوندا اولماياجاييق .

قورانلار دئىلىك، بيز قيرانلار يوق.
 كۆننيز، كۆلتويوك، يول يورانلار يوق.
 دوستا يوخ، دوشمنه دوست اولانلار يوق؛
 ياخشى كى، صاباحا قالمايا جاييق؛
 ياخشى كى، بيز اوندان اولمايا جاييق.

بلكدن چيخماميش بيز آغ ساققاليق.
 نهدن دانيشيلسا باشدا ناققاليق.
 پيس گونده اولوروق سوپروشن باليق؛
 ياخشى كى، صاباحا قالمايا جاييق؛
 ياخشى كى، بيز اوندان اولمايا جاييق.

هامى منم دئير، هامى من دئير.
 والله بيز دئنده منه تن دئير.
 سهوينى قانانا نه دئسن دئير؛
 ياخشى كى، صاباحا قالمايا جاييق؛
 ياخشى كى، بيز اوندان اولمايا جاييق.

هايدا، كويده گئدير داواميز بيزيم.
 آرتيق زهرله نيب هاواميز بيزيم.
 گرەك تك بو اولان دعاميز بيزيم؛
 ياخشى كى، صاباحا قالمايا جاييق؛
 ياخشى كى، بيز اوندان اولمايا جاييق

دۇستلا دوشمن آراسيندا

سئوينجىنى بۇلمە يە،
 ھامىيا آرکين چاتار.
 كدرىنى بۇلمە يە،
 اوزون گلەسه دئە بىرىن.
 دوشمن مين بير سۇز دئير،
 وئجىنه ده گلمز ھئچ.
 دۇستون آجى سۇزوندن،
 باجارىرسان يە بىرىن.

باتير گونش؛
 باتير گئجه ايله گوندوزون
 اۇپوشن دۇداقلاريندا.
 باتير آخسام قووشاغيندا،
 يورغون چاغيندا.
 گئدير بير آز تك اولماغا؛
 آزاجيق تنها قالماغا.
 گئدير صاباح سحره دك،
 گئدير يورغونلوغونى چيخارماغا...
 نه بو گونونكونه،
 نه دونه نينكىنه،
 نه ده كى، هئچ گونونكونه بنزه مه يه جك.
 دان يئرى سؤكوله جك،
 تزَه نَفْسَلَه،
 يئنى ايشيقلًا،
 اوفوقده گويره جك؛
 تپ-تزَه گورونه جك،
 گئجه يله گوندوزون اۇپوشن دۇداقلاريندا؛
 صاباح سحرين اوغلان چاغيندا!

تک قۇل آدامدا، آدامدير
جوت قۇل آدامدا، آدام.
تک گۇز آدامدا، آدامدير
جوت گۇز آدامدا، آدام؛
فقط آدامدان آدام
فرقله نير بير بونا:
او آدام كى آدامدى
گونده گيرمير مين دونا.

حيات يوللارى

يولى قيسا ائيلر، مقصدى ياخين؛
يولچوسى چوخ اولان يول اولار آخين.
بیر آز باشقا تورلى دوشونون، باخين
عاغیل ايشه دوشسه يولچى يورولماز.

باشين آياق چكر يوكونى يوخسا!
آياق باش اولانماز تاخدا دا چيخسا.
هاردان، نئجه بير چاي باشلاسا آخسا
سويى بولانماسا آخيب دورولماز.

كيم دئيبير بو حيات بير نؤوع قوماردى؟
والله حيات يولى دامار-داماردى.
دوشونن باشلارين يولى هاماردى
نيت تميز اولسا يوللار بورولماز.

سنلىدى، منلىدى گؤزهلدى حيات؛
بو حيات عشقينه دوشون، قور، يارات!
بيريميز اولماساق او بيرين ده آت!
يوخسا بير ائو اولماز، ائوجيك قورولماز.

بودا بئله...
 گئتدى اۋزى ايسته مه دن.
 ايتدى بىر گۆز قىرپىمىندا؛
 نه آردىنجا سو سه پن؛
 نه دالىنجا باخان اولدى.
 گئتدى آدى بىلىنمىز نهنگ بىر سونسوزلۇغا.
 قووشدى بىر تكللى يه -
 تنهالىغا.
 نه بىي واردىسا دا -
 بىغدى سانكى كه نه بىر داغارجىغا
 آپاردى اۋزى ايله تن؛
 كىمسه بىلمه دن؛
 غرىبه گۆرونمه دن.
 ايتدى بىر گۆز قىرپىمىندا،
 نه آردىنجا سو سه پن؛
 نه دالىنجا باخان اولدى....

بيز سئودىك آرانى، داغى؛
 او سئومەدى بيزىم تىك.
 بيز سئودىك گولى، چمىنى
 او سئومەدى بيزىم تىك.
 بيز نە سئودىك ائله سئودىك؛
 او سئودى تىك اۋزونه
 بيز سئودىك سئوينجه قارىشديق
 او تىك قالدى!
 تىك!

يۇللار

يۇللار

يۇللار

يۇللار

فيكىر ايشله ديكجه، گۆز ايشله ديكجه.

نه قدر گئديرسن قورتارمير اۇنلار.

يۇل واركى انساني ساپاند داشى تك

اوجا ذيره لردن دره يه توللار.

يۇل دا وار انساني درين دره دن

سعادت قوشى تك ذيره يه يۇللار.

يۇللار

يۇللار

يۇللار

انسان ادراكيندان، دوشونجه سيندن

يۇل آلار،

يارانار،

ياشايار اۇنلار.



.....

.....

.....

.....

.....

.....

.....

.....

.....

.....

.....

.....

.....

.....

.....

.....



.....

.....

.....

.....

.....

.....

.....

.....

.....

.....

.....

.....

.....

.....

.....

.....

سئوگی
قانادیندا

عاغلى اولمايانا دلى دئيرلر
كؤنولسوز ياشامين هئچ آدى يوفدى.
دلى نين يئنه ده اؤز عالمى وار
كؤنولسوز حياتين پير دادى يوفدى.

سَنى دوشونن زامان

ھارداسا بىر گون دوروب
 بىر يولون آيرىچىندا،
 گئىرىيە بويلاناجام؛
 كۆنلومدن يول آلاجام،
 سَنى دوشونن زامان.

اۆزومە دنيا قوروب،
 يولون يورغون چاغىندا
 بوشونا فيرلاناچام؛
 حسرتدن اودلاناچام،
 سَنى دوشونن زامان.

بلكە دە يوز-يوز ووروب،
 بىر چايىن كئارىندا،
 كئچمىشە توللاناچام؛
 يئنى دن آلداناچام،
 سَنى دوشونن زامان.

آی اوزه

یوللار اوزون، عؤمورده کی، یاری دی؛
 غم گؤلونده داها گلمز آی اوزه.
 بو دنیادا کیم یاریندان یاریدی،
 قوناق اولور هرگون گنجه آی اوزه.

کیم کی، اولدی دوستا کؤمک بیرینجی،
 او دوستی سان گوهر کیمی بیر اینجی.
 سن نانجیب بو سؤزومدن لاپ اینجی،
 نجابتلی گرهک گویدن آی اوزه.

ایکی یولداش داواسیندا آرا دور؛
 سؤزلرینه قولاق آسیب آرا، دور.
 ناموسا دور، غیرته دور، عارا دور؛
 بلکه دنیز اوره یینده آی اوزه.

بو گون هئچ بيلميره م نه اوچون، نه دن
 اوره بيم يئنه ده تالان اولوبدي.
 بلکه ده بودا وار، بو گون هارداسا
 مني ده بير يادا سالان اولوبدي.

قولاغيم سسدهدي، گوزوم يول چکير.
 ائله بيل اينديجه سن گله جکسن.
 هئچ نه اولماسادا شکسيز، شبهه سيز
 منيم بو حالما سن گوله جکسن.

نه اولار، گول، گوله گولمک ياراشار.
 تکی ائله ائتمه دونوم ايچيمده.
 ائله گل، ائله گنت، ائله دولان کی،
 قوی باری آليشيم يانيم ايچيمده.

يانىم اۋز اودومدا، اۋز آتشىمده.
 سَنىن ياندىرماغىن گرەك اولماسىن.
 ھانى بىر حقيقى سئون سؤيله كى،
 تپەدن دىرناغا اورەك اولماسىن!؟

اينان بو سۆگىمە، اينان عزيزىم.
 اۋزوم اۋز ايچىمده اونودولموشام.
 باشقا سۆز دئىمىرەم، نه دئىيم سنە
 اۋزومى اونودوب مَن سَن اولموشام.

بو گون ھىچ بىلمىرەم نه اوچون، نه دن
 اورەبىيم يئنه دە تالان اولوبدى.
 بلكە دە بودا وار، بو گون ھارداسا
 منى دە بىر يادا سالان اولوبدى.

بوز خنجىرى

ياز آيلارى

داغ دۆشۈندىن آخان چىشمە،

قىش آيلارى

داغ كۆسكۈندە دۇنۇب، قالدى!

آنچاق داغا درد اولمادى.

ياز نەقسلى اولدوغونى دويىسا اورەك؛

هئىچ بىلىرسىن نە اولاردى؟

داغ، چىشمەنىن بوز خنجىرىن اونودان تىك

سەندىن گلەن آغرىلارى،

اورەك بىر باش اونوداردى.

گۆره سن

گۆزلریمین یاشینا باخمایسان بَس اولا
 اوره ییمی سَن گلیب آغلایاندا گۆره سن.
 داغلامادیم الیمی آغلایسان بَس اولا
 اوره ییمی شهبه لر داغلیاندا گۆره سن.

مژده یوخدی ائله ییل، یولی دومان بورویوب
 منی سانکی یالقیزلیق دالسینجا سورویوب
 فاتح کیمی دؤیوشده، دئییشمه ده یورویوب
 اوره ییمی بلکه لر باغلیاندا گۆره سن.

آیریلیغا نه دئییم او یئرینی آلینجا
 قوشالاشاق-دئییرم، بیزی آیری سالینجا.
 اوندادی کی، سَن گلیب محبتین دالینجا
 اوره ییمی دَنیز تک چاغلایاندا گۆره سن.

ھەردىن بىر يۇل آلىب خاطرەلەردىن
سېزىن كۈچەنەردىن اۋتوب كىچىرەم.
بىلمىرەم نە اولور، نىجە اولوركى،
چۇخدان ايچمەسم دە ھەن ايچىرەم.

ايچىرەم اونودوم حسرت يوكومى.
اۋچوم او گونلەرنى قانادىندا من.
سنى دوشونىدە، سنى دوياندا،
قاچىرام دۋورمىدە اولان ھەر نەدىن.

تەكى سىن اولاسان غۇمرومدىن كىچىن؛
دىيام سىنلى اول، سىنلى اۋتوشە.
آخى گۇر ھاجاندى حسرت چىكىرەم
بو قدر گىجىكن سىنلى گۇروشە.

سەن كىچىن يۇللارا تىكىلىب گۇزوم؛
كۈچەدى، دۇنگەدى، بىلمىرەم نەدى.
ھامىسى آستادان پىچىلدايىركى،
بو قدر گۇزلمە او كى، گلمەدى...

بودور سىنسىز يىنە سىنلى گونومدى.
يىنە كۈچەنەردىن اۋتوب كىچىرەم.
يىنە يۇل آلىرام خاطرەلەردىن،
چۇخدان ايچمەسم دە بودور، ايچىرەم.

کۆنلوم ناغیل توخویور

پنجره‌میز آچیلیر
 دَنیزین ساحلینه.
 هر گون قۇلاق آسیرام
 لپه‌لرین دیلینه.

ایشده تنها قالسامدا
 من قالمیرام اورداتک.
 دَنیزین ساحلینده
 سَنلی دؤیونور اوره‌ک.

بو من، او سن، او دَنیز
 بودا کی، پنجره‌میز.
 قاغاییلار اوخویور
 کۆنلوم ناغیل توخویور.

بىلە بىلمم

بو يوك سۆڭى يوكودى،
 چكيسىنى بىلە بىلمم.
 من اونسوز چوخ آغلاميشام،
 اما اونسوز گوله بىلمم.

او چكسه ده هارا منى،
 باجارمازكى، يورا منى.
 آپارسادا گؤرا منى،
 اونا بير سوز دئيه بىلمم.

دويون دوشوب سوزوم ايندى؛
 درد منىمدى، اوزوميندى.
 فقط گرهك دوزوم ايندى؛
 اونونكىنى بىلە بىلمم.

سَنَه نه دئییم، نه دئییم

گیلئیلییم اؤز اؤزومدن؛

سَنَه نه دئییم، نه دئییم؟

تورا دوشدوم اؤز گؤزومدن؛

سَنَه نه دئییم، نه دئییم؟

باشلاسام دا ناشی-ناشی،

بیر عؤموردی اونون یاشی.

دئدین من یوخ، اؤزون داشی؛

سَنَه نه دئییم، نه دئییم؟

کؤنلوم چکیر هارا منی،

عاغلیم قویمور اورا منی.

گؤزوم سالیب تورا منی؛

سَنَه نه دئییم، نه دئییم؟

یاندیم، هله یاناسیام؛

یانا-یانا قاناسیام.

اؤز-اؤزومی داناسیام،

سَنَه نه دئییم، نه دئییم؟

اودوم بلکه کؤزدن دوشوب؛

دیلم بلکه سؤزدن دوشوب.

گؤزوم بلکه گؤزدن دوشوب؛

سَنَه نه دئییم، نه دئییم؟

سَنَ ده تک سَنَ،
مَنَ ده تک.
قوشالاشاق،
سَنَده بارین، مَنَ ده.
بیر گون گُلر،
سَنَ منیم عیبلریمدن یازارسان،
مَنَ سنین...
یوخ، اینان بونا!
او گون گلدیسه،
سَنَ اؤز نقصانلارینا قول چکرسن؛
مَنَ اؤز عیبلریمه.
ایندی کی، هله کی_
سَنَ ده تک سَنَ؛
مَنَ ده تک؛
سَنَ بیر آز منه گذشته کئچ،
مَنَ سنه؛
قوشالاشاق
سَنَ ده بارین،
مَنَ ده.

بیر آخار بولاغام،
 بلکه بیلیرسن؛
 اونئی بیلمه مکده اولادا بیلر.
 تر-تمیز قایادان آخسادا، آنجاق
 گور آخان بولاقدادا بولانا بیلر.
 بوداکی، حیاتی، حیاتی، گولوم؛
 حیاتی سئومه یورولا بیلر.
 بیر آخار بولاغام منه نه وارکی،
 نتیجه بولانسادا سن هله گورکی،
 سیسقا بولاقلاردا دورولا بیلر.

سَن يادىما دوشورسن

اوخوياندا بولبوللر
 سَن يادىما دوشورسن.
 چىچىك آچاندا گوللر
 سَن يادىما دوشورسن.

باھاريم سَن، يازيم سَن ؛
 گولمَرَه م، سَن گولمَه سن.
 سَنسيز هر آن ييليرسن
 سَن يادىما دوشورسن.

قىزلار ساچين هورنده،
 اوغلان سالىر كمنده.
 مَن اونلارى گورنده
 سَن يادىما دوشورسن.

قويما قالام يازى تك؛
 ياشايام تامارزى تك.
 ايكي همدهمى گورجىك
 سَن يادىما دوشورسن.

یوللار هَمَن یوللاردی؛
 چَکیلیب بیزدن سیزه،
 یول آلیب سیزدن بیزه.
 دی گل کی، اونداکى بیز
 توتاق کی هر بیریمیز
 نه سَن اوسان، نه من او.
 داغلار هَمَن داغلاردی؛
 دره لی، تپه لی دی،
 هله ده گزمه لی دی.
 دی گل کی، اونداکى بیز
 توتاق کی هر بیریمیز
 نه سَن اوسان، نه مَن او.
 قوش تک اوچاردیق قوشا،
 بیلمز دیک غصه نه دی؛
 یا او هاردان گلمه دی.
 دی گل کی، اونداکى بیز
 توتاق کی، هر بیریمیز
 نه سَن اوسان، نه مَن او ...
 ده بیشسکده، یئنه بیز
 بیر جاندایق ایکیمیز.

ياغيش ھاواسى

كولك لراوخويور يئنه؛
بالاجا بىر تۇزانا،
آزاجىق بىر سىرنىلىك
قارىشىدى بىر-بىرىنە.

ايچەرى شەردە كى،
فایتونا باغلانان آت
كوچه لىرىن بىرىندە،
بىر آغاج كۆلگە سىندە
باخىردى گۆيە مات-مات.

ايندى ياغيش ياغاجاق؛
جوم-جولوق ايسلاناچاق؛
يايىن بو اىستى سىندە،
ھاوانىن بوركوسوندى...

سورمه چكمه گۆزونه، -
گولوم، ياغاجاق ياغيش؛
لكه دوشر اوزونه؛
دى گل ياغيش ياغماميش.

سَن ده مَنیم کیمیسن

سَن ده هئچ شهبه سیز منیم کیمیسن؛
تنهالیق خوشونا گلمه سین گولوم.
عاغلین دا گئدنه گئتسه غَم یئمّه؛
کؤنلونه یول تاپان گئتمه سین گولوم.

عاغلی اولمایانا دلّی دئیرلر؛
کؤنولسوز یاشامین هئچ آدی یوْخدی.
دلّی نین یئنه ده اؤز عالمی وار
کؤنولسوز حیاتین بیر دادی یوْخدی.

دادسیز مئیوهنی ده کیمسه خوشلامیر؛
اؤزلنمَز یاشامین دادی اولماسا.
حکیم ده شهبه سیز درمان تاپانماز
اوفاجیق دردین ده آدی اولماسا.

آدسیز دردلریمیز باش آلیب گئدیر؛
هاردا دایاناجاق بیله بیلْمَریک.
کؤنولسوز یاشامین نه ائتدییینی
نه ائتسک عاغیلا گؤره بیلْمَریک.

نَفس آيىرسا قدا عىنى ھاوادان
 سَن آيىرى يۇلدا سان، مَن آيىرى يۇلدا.
 بونى ترسىنە دە چئوير، ھَمَن دى؛
 مَن آيىرى يۇلدا يام، سَن آيىرى يۇلدا.

بو يۇللار يۇنونى دىيشن دىيل؛
 اوچونجى يۇل گرەك ايكىمىزە دە.
 اصليندە ھر يۇلدان داھا گرەكلى
 اؤنملى اورەكدى ايكىمىزە دە.

اورەك قۇشا وورسا، بىرگە دۇيونسە
 كىمىسە سد اولماز بىر ائىش-يۇخوش.
 اورەك بىر وورماسا، يۇل بىردە اولسا
 اورەكدن يۇل آيىر حىاتا باخىش...

سَندە ھىچ شىبەسىز مَنىم كىمىسن؛
 تنھالىق خۇشونا گلەسىن گولوم.
 عاغليندا گئندلە گئتسە غَم يئمە
 كۇنلونه يۇل تاپان گئتمەسىن گولوم.

مىن بىر بلا گۆروب بلالى باشىم؛
 بىردە بو يوللارى گىتمىز دئىردىم.
 قورشانىب كۆنلومە سئودايا دوشوب،
 بىردە او سئودا دا اىتمىز دئىردىم.

اۆزومدن آغىردى ايندى بو دردىم؛
 اونونچون هر نه دن من كى، كىچىردىم.
 اوشاق عاغلىما باخ، نه ظن ائىردىم؛
 بو سئودا ابدى بىتمىز دئىردىم.

ائله بىل يۇخويموش آيىلدىم بىتدى.
 خوليايمىش يادا كى، دوماندا ايتدى.
 هارا گىتدىيىنى بىلمە دى گىتدى،
 مەنە باخ، مەن اونى گىتمىز دئىردىم.

سئودامىن دئيه سن دادى يۇخ ايمىش؛
 دادى اولماسادا دوزى چۇخ ايمىش.
 بلكە دە بىنادان بو بىر يۇخويمىش،
 اودوركى، نه ائىدى ائتمىز دئىردىم.

خَزَر ساحلینده بیر یووا قوردوم؛
 او یووام خَیالا قورولدی بیرباش.
 ائوده قالسام دا تک، رُویا تک اولدون
 خَزَر ساحلینده سَن منه یولداش.

سَنی مَن چکین آپاردیم اُورا؛
 بو یولدا کؤمه بیم خَیال یئلکه نیم.
 بیرده کی، سؤیله کی، خیالدا سونرا
 آخی دای باشقا بیر نه بیم وار منیم؟

شادام کی، سئوگیلیم هله یاخشی کی،
 خیال ترلانیمین قانادی وارمیش.
 هله گؤر سَن اوزون قوشولسان منه
 بو گئدیش نه قدر شیرین اولارمیش.

گول آکدیم، گول دَرمه دیم

گول آکدیم، گول دَرمه دیم،
گتیردیلر گۆزه مَنی.
یاندیم هیجران اودونا
درد باغلادی سؤزه مَنی.

کؤنلوم یارالی بیر قوش؛
گزیره م سرخوش-سرخوش.
أمیدیم خَزَل اولموش
سَن یئنی دن بزه مَنی.

دردلریم فیل بویدادی؛
گؤر نئچه ایل بویدادی.
دی گل کی، دیل بویدادی
گتییندیره تزه مَنی.

آهیم گؤیه چکیلدی؛
چیلیک-چیلیک تۆکولدی.
گؤر نئچه آی دی، ایلدی
سالیب ایزدن-ایزه مَنی.

دنیا نین گردیشینه
باخمادیم، گردیم سینه.
گلیب ایمانا، دینه
سَن گتیرمه گۆزه مَنی.

غربت‌ده

هئچ نهیین داماقدا دادی، داد اولمور
کیمسه نین ئیله سه آدی آد اولمور.
آدی اولانلارین آدی یار اولمور؛
غربتده بیر شئی یوخ، وطن یئرینه.

غربتده

غَمِين غَم يَثْرِي وار، دَمِين دَم يَثْرِي؛
 غربتده قاريشير بيري-بيريته.
 ذيلين ذيل يَثْرِي وار، بَمِين بَم يَثْرِي؛
 غربتده اوتورمور هتچ نه يَثْرينه.

هاوا كُونول آچمير، اورهك اُوخشامير.
 باشينا ياغان قار كُونلونه دامير.
 اوتوروب دوردوغون سَنه اُوخشامير؛
 غربتده دوشورسن تكلېك گيرينه.

الله دا تك دئيبيل، بو بير كلكدى.
 تكلېكده شيطان دا اوزى مَلكدى.
 هم صحبت دئدىبين دوزدى، چوركدى؛
 غربتده ياقسمت گوزه گورونه.

کرمی یانديران بير ساز چالان یوخ!
 اورهيه خوش گلن خوش بير يالان یوخ!
 آنا تک، باجی تک قادان آلان یوخ!
 غربتده ياشايان گرهک سورونه.

خوشبختسن ياد ائلده داياغين اولأ.
 بير ائوه گئتمهيه آياغين اولأ.
 ساختا سؤز ائشيدن قولاغين اولأ-
 غربتده دوشرسن لاپ سوت گؤلونه.

هئچ نه ييين داماقدا دادی داد اولمور.
 کيمسه نين نئيلهسه آدی آد اولمور.
 آدی اولانلارين آدی ياد اولمور؛
 غربتده بير شئی یوخ وطن يئرینه.

هردن فيکیرلشيب دوشونوره م کی،
 سن مَنی بلکه ده سوچلی سانیرسان.
 منیم بو تشویشیم قالسین بیرانا
 کئچدییم یوللاری سن کی، تانییرسان.

بویلان بیر اونلارا، باخ بیر یوللارا؛
 اوردا ایزلریمه راست گله جکسن.
 هاردان نئجه کئچدیم، نئجه یول ائتدیم
 هامی سین بیر به بیر سن گوره جکسن.

مطلق گوره جکسن، آخی او یوللار
 فهله آلی کیمی قابار-قباردی.
 هئچ نه یی هئچ یئره آپارماسادا
 منیم گنجلی بیمی آلدی، آپاردی.

او شهوه ساچلاریم ایندی بیاضدی؛
 آخی او گون لردن داها اثر یوخ.
 بویوکلر یانیندا سوزوم کئچردی
 ایندی یالوارسام دا سوزده کسر یوخ!

اُوندا هئج بيلمه‌ديم ياشيم نئچه‌دي؛
 گنجلييم آيمدن پير ائديب اوچدي.
 ها چاغير، ها باغير او گئري دؤنمز؛
 او قيزيل قوش ايدي آيمدن قاچدي.

هر آنين بئضي ني توتسام دا ايندي
 اوئن بيرجه آنين يئريني وئرمز.
 ياغيش نعيمينه بنزير بودا
 پاييز ياغيشيندا بير شئي گويرمز.

كئچدي آت بئلينده او گومراه ايللر؛
 نه قويدوق گؤتوردوك ايندي بيلن يوخ.
 آغلایان اولمادی داغ درديميزه
 او زوم تک او زومه ايندي گولن يوخ.

سن مني سوچلي دا تانيسان، تاني!-
 من سني قينايان دئيلم آخي.
 او گون لردن گلير منيم ده اينان
 قايعيمين، دويعومون، آرزومون چوخي.

ناغیلدی ہلہ

بالیق قوشی اوخویور
 نَقَسی سو سَسیلہ،
 دَنیزین لَپہ سیلہ.

اورہ ییم تیر-تیر آسیر
 جوت قاناد هَوَسیلہ،
 آزادلیق نَقَسیلہ...

بالیق قوشی اوخویور،
 زامان ناغیل توخویور...

بو یارالی کۆنلومون،
 اوجقار بیر نقطه سینده،
 قاتی دَرینلییینده،
 بیر یارا وار،
 هاچاندی
 پَرَن - پَرَن اولوبدی.
 بیلن بیلمه‌ین کیمی،
 لال کیمی
 دئییه بیلیمیر
 اونون یولی هارادی.
 یارام بئله یارادی.
 کور گوزوموز کیمیدی؛
 بوش سوزوموز کیمیدی؛
 لاپ اوزوموز کیمیدی.
 پَرَن - پَرَن اولوبدی.
 بو یارالی کۆنلومون،
 اوجقار بیر نقطه سینده،
 قاتی دَرینلییینده...

توكندى

من باهار عشقى ايله يوللارا چيخديم؛
 يوللار توكنمه دى، دوزوم توكندى.
 يورد يئرى چاغيرديم، وطن سسله ديم؛
 هيجران توكنمه دى، سوزوم توكندى.

هامى ائله بيلدى دوزومسوزهم مَن؛
 ديل-ديل اؤتسم بئله سوزومسوزهم مَن.
 بو سقر نه ايميش، اوزومسوزهم مَن؛
 له پير سالنامايم، ايزيم توكندى.

عشقىمله يوللارا چيخديم قوشا مَن؛
 چالديم اوز باشيمي اوزوم داشا مَن.
 عومرومى خرجه ديم بوشدان بوشا مَن؛
 يوللارا باخماقدان گوزوم توكندى؛
 يوللار توكنمه دى، دوزوم توكندى.

وَنکووئردن آچیق مکتوب

چیلچیراقلار ایچینده ایم.
 دؤرد بیر یانیم گؤزه للیکدی.
 تمیز لیکدی.
 ائله بیل کی،
 هیچ ناکسین
 نَفسی ده تُوخونماییب بو شهرین هاواسینا.
 داش آتانلار داش آتمایب سانکی بوردا
 نه بیر یولون یولچوسونا،
 نه بیر قوشون یوواسینا.
 بیر زامانلار ائشیتیمیشدیم
 قاردی بورا باشدان باشا.
 اوشاق ایکن ظن ائدیردیم
 بو اؤلکه نین یایی تن دی قارلی قیشا.
 دی گل بوردا
 گل-گل دئیر گول چیچکلر؛
 روح اُوخشاییر باغچا-باغلار؛
 کؤنول آچیر بوردا داغلار...

ایسته بیرسن
 کئچمیشینی گتیرمه دن دیله اصلا
 یاشا بوردا.
 ایسته بیرسن هئج باشینی چالما داشدان داشا بوردا.
 ایسته بیرسن
 گول-چیچکله، چیلچیراقلا، عؤمرونی وور باشا بوردا.
 ایسته بیرسن
 تک اؤزون اول،
 اؤزون اوچون آیین-شایین یاشا بوردا.
 یوکون باشقا یوک دئییلسه؛
 گؤتوردویون آغری یوکی،
 گتیردیین درد دئییلسه
 شن اؤته جک گونون بوردا؛
 خوش کئچه جک آیین بوردا، ایلین بوردا...
 بو شهرین گؤرونوشی؛
 بو طبیعت.
 قالدی ملت.
 کیمینسه کلمه کسبب دانیشمامیش،
 بش اوچ سؤزجوک قونوشمامیش،
 گؤز آیریر،
 اؤزودکی، تئز آیریر
 نئچه ملت جمع له شیبیدی ایندی بوردا.
 بو ملت لر آراسیندا
 هر ملتین اؤز ایچینده

آیری - آیری دردی وارسا؛
 غَم اُولورسا،
 یئنه ده وار اؤز ایچینده سؤز بیرلییی؛
 هم رأیلییی.
 بو ملّت لر آراسیندا
 بس گۆره سن بیز ملّتين یئری هاردا!
 تاریخه باخ،
 آيیرد ائله.
 " ددهم قورقود " زامانیدان هله قاباق،
 سَپَن سَپَدی آرامیزا بوللی نفاق، قوْجاق - قوْجاق.
 او جوجردی
 یاشا دُولدی.
 قوْچ " کوراوغلی " ساواشیندا " حمزه " اولدی.
 خرمی لر باش قالدیریب یئنی قیام باشلایاندا،
 سرکرده لر آراسیندا،
 ایکی قارداش داواسیندا،
 او یول تاپدی، باشدا دوردی.
 اولان اولدی،
 اولن اولدی...
 بیز هله ده ائله واریق؛
 پرن - پرن اولانلاریق.
 هله ده آلدانانلاریق.
 وطن اوغلی،
 وطن قیزی،

ايندى اۋزون آيىرد ائله؛
 يا اۋزون اول، اۋزون اوچون ياشا بوردا؛
 يا داكى، گل باشقاسيلا دئييل، باشلا
 ايچينده كى، منى باشدا ايچينده بوغ!
 دوشونجه نندن اونى بوشلا.
 گور گنديرسن هانسى باشلا؟!
 او بيرلى بين يولى دئييل، دئييل منجه!
 هم رايلى بين يولى دئييل، دئييل منجه!
 بس ائمه دى وارليغيندان اوزاقلاشماق؟
 بس ائمه دى باشقالاشماق؟
 بس ائمه دى
 اۋز ايچينده اۋز-اۋزوني
 محو ائمه بين!
 بس ائمه دى
 باشقاسى نين وارليغيندا
 دئه ائمه بين!
 بس ائمه دى
 قطعه قطعه،
 بولگه بولگه،
 ذره ذره،
 قيرام-قيرام آريمه بين؟
 سؤيله هانى سوز بيرلى بين؟...
 سؤيله هانى بارى سوزده همرايلى بين؟
 وطن اوغلى،

وَطن قیزی،

مَنیم دردیم سنله باشدا همراى لیکدی.

مَنیم غمیم سنله قوشا هله سؤزده او بیرلیکدی.

داشی بیرام اونی هله؛

داشی بیرام گؤرونمورده بو یولومون سونی هله.

داشی بیرام داشیدیغیم یوکومی من بیله-بیله.

داشی بیرام بلکه بیر گون

یوکوم اؤزی دیله گله...

عؤمروم کئچیر آغریلاردا،

عذابلاردا...

آری بیرهم گیله-گیله،

آما اوزوم گوله-گوله...

چیلچیراقلار ایچیندهیم

دؤرد بیر یانیم گؤزه لیکدی،

تمیزلیکدی...

هاوا توتولوب يامان؛
 اوخشايير اوره ييمه.
 زهر قاتيليب آرتيق
 دوزوما، چوره ييمه.

قوى بير ايچيم سو ايچيم؛
 گيلدير-گيلدير آغلاسين،
 يوللاريني باغلاسين
 سما منيم يتريمه.

آمان، آمان، ديل آمان؛
 هاوا توتولوب يامان!

دَییشه جک بو هاوا

دان یئری سؤکوله جک؛
 گوموشی دُون گئیه جک
 بیر آزدان ماوی دَنیز؛
 دؤیونور اوره بییمیز،
 کوتلشسه ده بیئیمیز.

دَییشه جک بو هاوا
 خیال آتیم چاپاجاق،
 دَنیزده جان تاپاجاق.
 ایچیمده سَسی دَنیز؛
 یئنی نَفَسی دَنیز.

او باهار نَفَسلی گنجلیک ایلریم
 قالدی گۆر نه قدر مندن اوزاقدان.
 غربتده یایدا دا اوشویور آلیم،
 اوشومک بیلمزدی قاردا، سازاقدان.

ایندی او گونلردن نه قدر اؤتوب؛
 دَیشیب چوخ شئین دادی، لذتی.
 غربتده دوشورسن دیلدن، داماقدان؛
 بعضا سئچنمیرسن یئدی بین اتی.

بعضا ائله اولور، ائله اولور کی،
 هئچ نه یه، هئچ یئر هوسین اولمور.
 بعضا ائله اولور، ائله اولور کی،
 گره کلی ایشه ده نَفَسین اولمور.

بوردا عادی سؤزله دوشمن اولور دؤست؛
 سانکی بو دؤستلوقلار بیر توک اوسته دی.
 کئچمیشی اولمایان هر شئی بئله دی،
 اوردان هر نه وارسا، وار کؤک اوسته دی.

ائله اونا گۆره لاپ قیرام-قیرام
 اۆزونه سن حورمت، شان قازانیرسان.
 ائله اونا گۆره هر بیر کلمه‌نه،
 بؤیوکدن، کیچیکدن جان قازانیرسان.

اودور ساختا ایشه جرعتین اولمور؛
 شه‌رده، کوچه ده تانی بیر سنی.
 آزینی، چوخونی تئز سئچیر هامی؛
 آن عادی سهو اوسته قیناییر سنی.

بورا باشقا یئردی، اورا باشقا یئر؛
 بو فرقی دویاجاق هر دؤین اوره‌ک.
 گزیزب آختاردیغین یولی، ارکانی
 آراییب تاپماغا جیغیر، ایز گره‌ک.

بوردا نه جیغیر وار، نه ده کی، ایز وار؛
 سنی ایره‌لی‌یه گۆتوره بیلسین.
 آخی کؤنول آچان نه ده خوش سؤز وار،
 سنی آیدینلیغا یئتیره بیلسین.

باهار یاغیشیندان سونرا گۆیه‌رن،
 گۆبه‌لک کیمی‌دی بوردا اوجالماق.
 اودا کی، نئيله‌سن معلومدی اولماز،
 بشش گونلوک عؤمورله یئتگین قوجالماق.

اورد ا جیغیر تانیش، ایزده تانیشدی؛
 ائله بیل او یولی اوزون چکیسن.
 سنه ائله گلیر بلکه ده بیر گون،
 سن اوزون ایلک دفعه اوردان کتچیسسن.

بوردا هامار یول دا باتلاق کیمی دی؛
 بشش آددیم ایره لی گئدن تاپیلماز.
 آخی هامی بیر یوخ، تک تکدی بوردا؛
 تک آلدن معلومدی هئچ بیر سس اولماز.

آن عادی داش سنه اورد ا یولداشدی؛
 بیلیرسن او هانسی قایادان قوپوب؛
 ائله بیل او داغلار سنه قارداشدی؛
 هاواسی جانینا، قانینا هوپوب.

دنیز کناری نین آغاجلاری تک،
 کؤکی اوزده اولور بوردا هر نهیین.
 بو خصلت بلکه ده تورپاقدان گلیر؛
 کؤکی درین اولور اورد ا هر نهیین.

بورا باکی‌دی

بورا باکی‌دی

اوجا بیر داغی یوْخدی

اوره‌یین سیخیلاندا

اُوْخشار گونلرین گنْدیشیندن یورولاندا

ذیره‌سینه چیخاسان

تَر-تَمیز هاوا اوداسان.

بورا باکی‌دی

قیزیل اوزن چایی یوْخدی

زولال، تَمیز آخار سولارینا قوْشولاسان

روحونى تَمیزله‌یه‌سن، سَسی ایله یویاسان.

هله قیزقالالی قافلانتی ایسته‌میره‌م

هله گۆم-گۆی دۆشه‌مه‌لی

سحیرلی گئن دره‌لی روح اُوْخشایان بوزگوشونى دئمیره‌م

بورا باکی‌دی

دؤیمه‌یب گیره بیلدییین قاپی یوْخدی

نفت قوْخولی بو شهرین

تام یوْخولی بو شهرین

سَسیندن

قورغوشون کیمی نَفَسیندن

آرا بیر قاچا بیله‌سن

کؤنلونی کیمسه‌یه آچا بیله‌سن

بورا باکی‌دی

اُورا میانام منیم!

شبهه سيز چوخ شئيدن دانيشميشيق بيز
 آما اوزوموزدن دانيشماميشيق.
 اونونلا، بونونلا باريشميشيق بيز،
 آما اوزوموزله باريشماميشيق.

بيرينجى ايشيميز سونا كئچيدى؛
 ائله اونا گوره چاش-باش دوشموشوك.
 باشدا اوزوموزله داعوا قورموشوق
 اوزوموز دوشمنين ايشين گورموشوك؛
 ائله اونا گوره چاش-باش دوشموشوك...

گل ای وطن اوغلی، ای وطن قیزی!-
 بيز اگر بير جانيق، جان دئيك بير آز.
 باشقا دردلر اوچون آرتيق يانميشيق،
 اوز درديميز اوچون يان دئيك بير آز.

بير آز اوزگه سی یوخ، اوزوموز دئيك.
 آخی بو دنيادان بيزده بير پاييق.
 هانسی مؤوجودلوقلا، هانسی وارليقلا
 سؤيله کی، دئيه ليم آخی بيز واريق؟
 آخی بو دنيادان بيزده بير پاييق!

شبهه سيز چوخ شئيدن دانيشميشيق بيز؛
 آما اوزوموزدن دانيشماميشيق.
 اونونلا، بونونلا باريشميشيق بيز؛
 دی گل اوزوموزله باريشماميشيق.

کۆنلومه مَلحم او سئودالی آنلار،
 بیرده بیز طرفه گئرییه دؤنمز.
 توتاق او گونلر تک گون تاپیلسادا
 غربتده ها جان آت، او جانا سینمز.

قویوب گلدیییمدن اوردن ملتی،
 بوشونا گزیرم بوردا عزتی.
 قاجیبیدی آغزیمین دادی، لذتی؛
 اودی کی، هئج منیم بیر اوزوم گولمز.

هردن فیکر ائدیرم اوزومه یادام؛
 دوغما یورد یئرینده موتلی دی آدام.
 بوردا نه ساز، نه تار، بَم اؤتن اودام
 بونی غربت دادی دادمایان بیلمز.

دردینی بیری ایله بؤله بیلمیرسن؛
 گولسنده اوره کدن گوله بیلمیرسن.
 اؤلکم ایسته سنده اؤله بیلمیرسن،
 کؤنلی حسرتلی لر غربتده اؤلمز.

سونا چاتایدی بو آیریلیق تکی؛
 کئچر بودرد یوکی، بو آغری یوکی.
 سئچر بیر گون هامی لاپ توکدن توکی،
 اوندن هیجران آلی بیر قاپی دؤیمز.

ھارا گئدير؟

بو يول بيزه گئدن دئيل؛
 منى ترسينه دؤنده رير.
 بئله كي، گئدير او منى
 گئدر-گلمزه گؤند رير.

يؤنى قارما-قاريشقدى؛
 ھارا گئدير بيلينمير ھئچ.
 ائيشيني، يوخوشونى
 نئجه باخسان گورونمير ھئچ.

اؤنى باغلى، يؤنى باغلى؛
 بو يول ھارا يوللاناچاق؟
 گئديشينده، گليشينده
 يوخدى تانيش داياناچاق.

نه قوشولان نه آيريلان
 يوخدى يئنى بير يولچوسى.
 تامام باشين ايتيريبدى
 ھم ساغچيسى ھم سولچوسى.

سؤنى يوخدى يوخ بو يولون؛
 او بير يئر ھارماياچاق.
 ھارا گئدير بير بيلن يوخ!-
 يولچوسى يولدا قالاچاق.

هاچاندی باشیمدان بیر فیکیر کئچیر؛
 نییه بئله کئچیر، نییه، بیلمیره م.
 تله‌سیک ایشه ده منی لنگیدیر؛
 اوئی نئجه دئییم، دئییه بیلمیره م.

او بلکه یو خودی، یوزولمالی دی؛
 بلکه ده یوخی یوخ، رؤیادی، بیلیم.
 هر نه دیرسه منی مندن آلییدی؛
 رؤیادی، یوخسا او خولیادی، بیلیم.

فقط بیلیره م کی، اون اوچ یاشی وار؛
 آدی هر نه دیرسه دادی حسرتدی.
 اولان اولاجاقدی دئیمیش بابالار؛
 بلکه ده نه بیلیم بودا قسمتدی.

یاداک، او دئیمیش آلین یازیمدی؛
 منی اوژ آردینجا دولاندیراجاق.
 بلکه ده غربتده بو بیر حسرتدی؛
 دؤنوب یاواش-یاواش نیسگیل اولاجاق.

قالمیشام، بیلمیره م، نئجه سؤیله ییم؛
 بو فیکیر کؤنلومی لاپ اویاجاقدی.
 هردن ظن ائدیره م و طنه دؤنسم،
 آنامین مزاری چارتدییا جاقدی.

هاچاندی باشیمدان بو فیکیر کئچیر؛
 نییه بئله کئچیر، نییه، بیلمیره م.
 تله سیک ایشه ده منی لنگیدیر؛
 اوئی نئجه دئییم، دئییه بیلمیره م.

آتامین دُنیا سینا،
 آنامین لایلا سینا،
 یامان غریبسه می‌شم.
 او یول قیراقیندا کی،
 او چئشمه باشیندا کی،
 اود-اوجاغین توستوسی،
 منه غریبسه‌ین تک.
 او صحبت‌لر، او سؤزلر،
 او جیغیرلار، او ایزلر،
 منه غریبسه‌ین تک؛
 آتالی دُنیا م اوچون،
 آنالی لایلام اوچون،
 من ده غریبسه‌یمیشم.

كولكلر اوخويور يئنه.
 اوخويور ياد بير مغنى تك.
 سسينده باشقا نَفَس،
 نَفَسينده اوزگه سَس.
 كولكلر اوخويور يئنه...
 روحومون دينجلى يى يوخ،
 كوئلومون تسللىسى.
 كولكلر اوخويور يئنه.
 اوخويور ياد بير مغنى تك...

يئنه ده يورد يئرى يوخوما گيريب؛
 آنالى گونلريم قايداجاقدى.
 هاچاندى آغريدان اوره ييم آغليز،
 آنام اوره ييمي اوووداجاقدى.

شفا آللرينى چكەجك يئنه،
 نه آغريم قالاچاق، نه ده تشويشيم.
 يئنه اولاجييام اركوئون جوجوق،
 ياغ كيمي گندهجك يئنه هر ايشيم.

يئنه مينه جي يم گنجليك آتينا؛
 آل چاتماز اولسادا او منه ايندى.
 گوردويوم هر نه وار يوخى اولسادا
 بودور كوسكون كؤنول دانيشدى، ديندى.

يئنه كوچه ميزده محترم خالا،
 اؤنومه چيخاجاق اؤز آنام كيمي.
 يولا چيخديغيمدا ياخشى يول دئييب،
 آرديمجا باخاجاق اؤز آنام كيمي.

يئنه ده ساچلاريم سيغاللاناچاق؛
 يئنه ده عؤمرومه نور ياغاچاقدى.
 ساغيمدا، سولومدا باجيم، قارداشيم،
 آتام آرخامداجا داغ اولاجاقدى.

يئنه او گونلره قايداجييام؛
 يئنه دردلريمى اونوداجييام.
 بو حسرت، بو نيسگيل، بو غم گنده جك،
 تپهدن ديرناغا اود اولاجييام...

غريبه گلسه ده، ياد گؤرونسه ده،
 منى بير گون دويان تاپيلاجاقدى.
 بوگون اولماسادا بيليره، اوگون،
 يورد يئرى يوخوسى چين اولاجاقدى.

اۇندا هئج نيسگيليم، موراديم قالماز؛
 ائله بير عؤمرى من ياشاييب اولسم.
 بو گئجه يوخوما گيرن وطنين
 اولمهرم يئنه بير قوينونا گيرسم.

سەھو گۆرونور، عیب گۆرونمور

ھانى مَن گۆردويوم يالار، ياماگلار؟
 ائله بيل اونلاردا كيچيليديلر.
 باسيلماز قايلار، آشيلماز داغلار
 كئچيلمز قالمايب، كئچيليديلر.

نه آنام ديريدى، نه آتام قالير؛
 يوخدى بير سؤيكه نيب آرخالانديغيم.
 آرخامدا داغلارى قويدوم دا گلديم؛
 يالانميش بوش يتره آرخالانديغيم.

دوزدى، بؤيوسه ده بيزيمده شهر
 منيم آزاليدى اورد امكنيم.
 اوزمدن كيچيكه من اينانارديم؛
 ايندى بؤيوكه ده يوخدى ايناميم .

ائله اونا گوره اول بيلركى،-
 اوزوم اوز ايچيمده تنهالانميشام.
 ائله اونا گوره اول بيلركى،-
 تنهالانميشام كى، تنهالانميشام.

ائله بیل ایتبیدی یولوم، آرکانیم؛
 گزيب دولاشيرام بيلميرم نئجه.
 يئييب ايجديبيمين يوخ دادی دوزی
 نهدن ياپيشيرام او گلدير وئجه.

دنیا ديشن تک ديششم ده من
 خاطيره ياداشيم هئچ ديشمه ييب.
 يئنی نسیلرده يول ديشسه ده
 هله ده ياشايير، سوچ ديشمه ييب.

من سنی، سن منی گوناھکار بيلير،
 من منی، سن سنی سوچلی بيلميريك.
 بیری بيريميزده سهوی گوروروك
 اما اوزوموزده عیبی گورموروك.

چوخدان بحثده يم اوزوم اوزومله؛
 يوللار آيريجيندا چاشيب قالميشام.
 يولچی اولماغيمدان يورولماسام دا
 يولسوز قالماغيمدان من يورولموشام.

هردن سيخيليرام، داريخيرام من؛
 آتالی گونلريم يادىما دوشور
 هردن قيريليرام، دارييليرام من؛
 آنالی گونلريم يادىما دوشور.

هردن ائله اولور، ائله اولوركى،
 اوز-اوزه دورورام اوزوم اوزومله.
 چاشيرام قاليرام، بيلميره م نه يى
 آده ائده جه يم بئله دوزومله.

بعضا قايتماغا قرار وئيريم؛
 منى چاغيرانيم او اود-اوجاقدى.
 گوره سن قايتسام منيم اوزومه
 ايندى نئجه قاپى آچيلاجاقدى؟

دوزدى، بويوسه ده بيزيم ده شهر
 منيم آزاليبدى اوردا امكانيم.
 اوزومدن كيچيكة من اينانارديم؛
 ايندى بويوكه ده يوخدى ايناميم.

یول ...

پیچا-پیچ دوشدی یئنه،

دَنیزین سینه سینه.

لَپه لر یئلکن آچدی،

قاغایی دسته سینه.

کؤنلوم دَنیزدی، دَنیز،

فیکریم اُونون ساحیلی.

دَنیزین ساحیلینده،

اویویوب دالغا دیلی.

داها دؤنمک واختی دی،

او ساحیلدن دَنیزه.

دالغا بوی قَدردی،

یول باکی دان تبریزه.



.....

.....

.....

.....

.....

.....

.....

.....

.....

.....

.....

.....

.....

.....

.....

.....

دوشوننده سیزی

دویاندا سیزی

هَلَه گون كئپه جك، زامان اوته جك
دؤوران ده ييشه جك گلن-گئده نى.
درديمه پوخ شريك تاپيلا جاق، تك!
هنچ كس بيلمه يه جك من ايتيره نى.

آتامین خاطره‌سینه

داغلارین ذیره‌ده آغاران قاری،
 آتامین ساچینی یادیما سالیب.
 دُولانیب فَصیللر، دُولانیب ایللر،
 داغلار تک اُونون دا ساچی آغاریب.

آتام مَفتونام، داغلارا حیران؛
 کُونولدن وورغونام بئله وارلیغا.
 بئله قوشالیغی گُورندن بَری،
 ایسته‌ره‌م یولومی دوشه قارلیغا.

یول ائده‌م، اوشویه آلیم، آیاغیم؛
 دوشونم اُونلارین چکدی‌یی دردی.
 آتامین دا ساچی دوم آغ اولمازدی،
 داغلار تک آغیر یوک گۆتورمه‌سئیدی.

هئج کس بیلمه‌یه‌جک من ایتیره‌نی

سیغال گۆرمه‌یه‌جک داها ساچلاریم؛
 هانی او آتالی، آنالی دنیام؟
 گئتدی گومراهلیغیم، آرکۆیونلویوم،
 قاییتماز آنالی-آتالی دنیام!

هانی امید یئریم، اوماجاق یئریم؟
 دردیم دنیانین هئج وئجینه گلمز.
 آتام بیر عالم‌دی، آنام بیر عالم؛
 کیمسه اؤزوم کیمی دوشونه بیلمز.

ایندی بالام بویدا آتایم، دی گل
 هله ده چوخ شئی آتا گزیره‌م.
 باشیمی دیزینه قوبوب دینجه‌لم
 آنا آختاریرام، آنا گزیره‌م.

ائله بیل قیریلیب قوشا قانادیم؛
 هانی شیلتاقلیغیم اویویان قوجاق؟
 اوره‌ییم اوشویور، جانیم اوشویور
 هانی ایسینمه‌یه ایستی بیر اوجاق.

دوزدی کی، آغاریب ساچیم، ساققالیم،
 دؤیولمه ییم چاتیب آتا آلیله.
 خَمیریم کوت گئدیر نییه، بیلمیره م
 سؤیولمک ایسته رم آنا دیلیله.

حیسیم، هیجانیم، روحوم هاوالی؛
 دُولایلاردا ایتیب گومانیم منیم.
 سؤیوق بیر ائو قالب اودسوز، اوجاقسیز
 هانی دینیم منیم، ایمانیم منیم؟

ساناسان گونلریم دیشیب تامام؛
 اوزوم اوز ایچیمده باشقلاشمیشام.
 آتالی، آنالی قانادلاریملا
 کئچمیشده دئمه بس داغلار آشمیشام.

غمیم غم یئرینده، بو گون دمیم ده
 کدر جیغیرینا دوشوب نه دنسه.
 ایچیمی گؤینه دیر دونه نیم منیم
 والله، دئمک اولمور بونی بیر کسه.

هله گون کئچه جک، زامان اؤته جک
 دؤوران دیششه جک گلن گئده نی.
 دردیمه چوخ شریک تاپیلاجاق، تک!
 هئچ کس بیلمه یه جک من ایتیره نی.

قوجامان شاعیر هاشم ترلانی ۶۵ یاشینا

سَنین حیاتیندا نه وار آی استاد؟ _
 بوتون سئؤنله رین دیلینه دوشدون.
 سَنین صنعتینده نه وار آی استاد؟ _
 سئؤن کؤنوللرین تئلینه دوشدون

تَمیز حیاتینا وورغونلاریق بیز،
 شعیر صنعتینه وورولان کیمی.
 هر کیم اولور اولسون سئؤجک سَنی،
 فقط روحاً اوزی دورولان کیمی.

وسعتلی باخیشلا گؤرورسن دَرین،
 بو سَنین ائل ایچره اوجالیغیندی.
 هر سؤزون، کلمه نین بیلیرسن یئرین،
 حؤرمتین سانما تک قوجالیغیندی.

قوجا وار یوز یاشی واردی، دی گل کی،
 ائویندن اوزاقدا چَکیلیمیر آدی.
 هر صنعت سئؤندن سوروشسان دئیر:
 یاخشی کی شعیریمیز سنسیز اولمادی.

بئله بیر یولون وار ائل ایچره استاد،
 سَنین هر کلمه نه هامی دئیر: جان!
 یاشا، یوز ایل یاشا، یاشا آی استاد،
 سن کی قوجالمیرسان، جاوانلاشیرسان.

نئجه یازیم مَن؟

میانا شه هری نین محاربه ایلرینده بوم-بارانیندان سونرا
آذر مازندرانی نین منه مراجعتله یازدیغی شعرینه جاواب.

سئوگی شاعیری یم، عزیز قارداشیم!-
نفرتیمدن یازیم؟ - نئجه یازیم مَن؟
ائویم دارما- داغین، باغیم خزاندى،
ثروتیمدن یازیم؟ - نئجه یازیم مَن؟

یازیم "یاندی کرم" دانی شیر سازیم؟
یا قیسا اوغراییب باهاریم-یازیم؟
اؤلدى مین-مین آرزو دئییرسن یازیم؟
ذلتیمدن یازیم؟ - نئجه یازیم مَن؟

اؤلومدن بئزارام گؤر بیر هاچاندان،
اؤلومدان راضی یام من گؤز آچاندان.
ائلیم داغیلاندان، ائویم اوچاندان
عزتیمدن یازیم؟ - نئجه یازیم مَن؟

پارتلادی بومبالار قالمادی جانلی؛
آل-اوزوم قانلی دی، گؤزوم ده قانلی.
آلئودان یوغرولان آذر نشانلی
خصلتیمدن یازیم؟ نئجه یازیم مَن؟

دانیشان سَسینی قالخیزیر زیله،
 شهیدپرور دئیر بیزیم ده ائله.
 اؤزون دئه، مَن نئجه سؤیله ییم بئله؟!
 شهرتیمدن یازیم؟ - نئجه یازیم مَن؟
 یازیم کی، قالمادی داش اوسته داشیم؟
 بو قدر درد اولار، قاندی گؤز یاشیم.
 اولدی گور نه قدر قوهوم-قارداشیم،
 غیرتیمدن یازیم؟ - نئجه یازیم مَن؟
 سوروشما دردیمه نه دیر احتیاج.
 صلحه، سعاده گزیرهم علاج!
 خوش گونه مُحْتَاجام، شاد گونه مُحْتَاج!
 حَسرتیمدن یازیم؟ نئجه یازیم مَن؟
 بو آغیر دردلری قوی چَکیم اؤزوم؛
 کؤنول کی تیکنمیر ایندی بیر سؤزوم؛
 نه لازیم سیندیرا، آی ایکی گؤزوم!
 مُحْتَتیمدن یازیم؟ نئجه یازیم مَن؟
 سئوگی شاعیرییم، عزیز قارداشیم؛
 مُحَبْتدی منیم یاخین سیرداشیم.
 سن سؤیله، نه یازیم، صَنعت یولداشیم؟!
 نفرتیمدن یازیم؟ - نئجه یازیم مَن؟!
 حیرتیمدن یازیم؟ - نئجه یازیم مَن؟!

یاراتماق یاشاماقدیر عنوانلی شعر کیتاییمین جلدینین
طراحی خانیم شهلا دانشمنده

داخلی دنیا ما قدم قویموسان؛

مَن هله اوزونی گورنمه میشم.

آخی چوخ سوزده وار -

اوزوم دئیینی

سَن گورهن دنیا ملا دئیینه میشم.

منجه اوزوموده گورمک گره کدی!

مَنی دوشونمه یه آزدیر سوزلریم.

دوزدی کی، او منیم دنیا مدی،

آنجا ق :

بعضاً ده سوزومی دئییر گوزلریم.

آتامین قه بیر داشی یازیسینا

نییه مزار بویدا کیچیلدین، آتا؟
 دئیردیم، آرخامدا بیر اوجا داغ وار.
 گئتدین بیر ابدی قایتماز یولا،
 ایندی آرخامدا یوخ، سینهمده داغ وار...

آنا لایلا

اوزون گئجه لری،
 سویوق گونلری
 آی آنا، فیکرینله یاشایا جاغام.
 سنلی گونلریمی سنسیزلی بیلمده
 عؤمور یوکوم کیمی داشییا جاغام...
 سن بونی هئچ زامان بیلمه یه جکسن.
 داها نه دردیمه آلیشاجاقسان،
 نه ده سئوینجیمه قاریشاجاقسان
 آخی سن هئچ بیرین گوومه یه جکسن...

دوققوز یوز اون بیر

بولود قارا پاپاغا

اۆلدى بیرى؛

سئوهنى آغلامدى؛

ياس توتوب قارا باغلامدى...

بیزیم ائلده،

اوبادا

اۆله نه آغلایارلار؛

ياس توتوب قارا باغلایارلار.

اونا بیرى ياس توتمادى؛

قارا باغلامدى،

آغلامدى.

سئوهنى چکیندى

یاخین دورمادی،
 اوتاندی.
 اوزاق یاخین دۆستلاری،
 یول یولداشی اولدوغی یولداشلاری،
 یاخین اولماسالاردا دیلداشلاری،
 اوسته گل لاپ سیرداشلاری،
 حالینی سورماغا یوباندی!
 اۆلدى!
 یاشاماسینا بنزەمەدى اۆلومی.
 اۆلنده سَس سیز اۆلدى.
 سَس سیز، سَمیر سیز اۆلدى.
 هایسیز، کویسیز اۆلدى.
 اۆلدى!
 آلتی گون سونرا بیلیندی اۆلومی.
 بو بیلگی غریبه یدی؛
 غریبه ده گۆرۈندى.
 بیر تلفن زنگ چالدى؛
 نمره ۹۱۱-دى.
 پلیس نمره سی بیغلیمیشدی.
 تیتره یه رک بیر سَس
 یاییلدى تلفن تئلریندن
 آلوو؟! -دئدی.
 اوزالتماغا نه حاجت،
 سۆزونون جانینی دئدی:

بیزیم بیر قونشوموز وار
 سَس-سَمیر یوْخدی اوندان
 آلتی گون اولار دئدی.
 بلکه بیر گۆرن اولوب؟
 سیزه خبر وئرن اولوب؟
 ائوده اولسایدی بیلردیک؛
 آن آزی گونده بیر کره گۆرردیک.
 بیر یئره چیخمامیشدان،
 هاچان دؤنهجک دئیردی.
 یاریم گون اولمامیشدان
 گئجیکسه خبر وئردی.
 ائوینده بیر پیشی یی وار
 بیلمیره م آجدی،
 سوسوزدی.
 اولوبدی،
 دیریدی.
 منه ائله گلیرکی،
 ائوینه باش وورمانین
 والله ایندی یئریدی.
 بلکه هئچ بیلمه میشیک؛
 گلیب ده گۆرمه میشیک
 دیلیم لال نه بیلیم،
 بلکه ده اؤزوده ائویندهدی.
 پیشی یی بیر یانا دورسون

اؤزوده چوْخدان بری
بیرآز آغیر خسته‌دی...

سوسدی تلفن تئلری
هر یئرہ چوْکدی سکوت؛
سکوتدان دوْغدی تئل-تئل
باشقا-باشقا فیکیرلر
فرقلی دوشونجه‌لر.
هر کس کیمی منی ده
آلدی گوْتوردی سکوت -
گؤر هارادان هارایا.
یول آلیب دا یوللاندی
بیزیم ائله اوبایا...
بیزیم یورد دا، شہرده
قارامد آدیندا
بیری واردی،
یاشاردی.
لاپ اونا بنزه یردی
حالی دا،
خویودا.
تویوق اوْغورلایاردیلار -
او ساتاردی.
قویون-قوزی چالاردیلار
نم-نشان قالماسین دئیہ،

گۆرن اولماسین دئییه،
 ایشه دوشردی؛
 اویون قوراردی.
 اولانی، بیتنه نی لاغ-لاغ ائدردی
 اویونا قویاردی؛
 یولونا قویاردی...
 هر نه یی اونا بنزه یردی
 آداسی دا،
 صداسی دا.
 بیر آلی خئیرده،
 بیر آلی شردئیدی.
 بیر آلی باغلیدی اوغروویلا،
 بیر آلی گوناھکاری دوغروویلا.
 غربت ائلده، غربتده
 اوسته گل بیرده حسرتده
 اؤلدی!
 خبر توتان اولمامیشدی خبر وئرسین.
 سوراغین آلان اولمامیشدی
 ائله یدی، بئله دی دئسین.
 اؤلدی!
 آلتی گون سونرا بیر تلفن زنگ چالدى؛
 نمره ۹۱۱-دی.
 پلیس نمره سی ییغلمیشدی.
 اولان اولموشدی...

اۋزوملە

اۋزوم

گوناھیم پوڭ اولوب اوزوم بیلەنى
كۆنولسوز ايشە من آرتيق دالميشام.
قالميشام بېردەكى، كۆنولسوز ايشەن
كۆنوللى ايشە پوڭ بزا آلميشام.

حیات یوللاری نین دولایلاریندا
 اوره ییم بیرینجی کۆمه ییم اولدی.
 کۆنوللی عۆمر ائدیب، یاشاماق اوچون
 سفربر ائده نیم اوره ییم اولدی.

فقط نه گیزله دیم بعضاً چاشراق
 آیرا بیلمه دیم خئیری شردن.
 یورولدی قیچلاریم، قورخدی گۆز لیریم،
 ائیشلی، یوخوشلی یوللاردا بعضاً.

بعضاً منلىيىمى تامارزى سالدىم،
 كۆنولسوز اولماغا جان اتان زامان.
 فيكرىمىن حوكمونه باش آيدىم، دى گل
 كۆنولسوزلويومه من چاتان زامان.

بعضاً دوز يئرینه يالان دانىشدىم؛
 دوزه آيرى دئدىم بعضاً ده هله.
 كۆنلومون حوكمونى دوز بيله-بيله،
 باش آيدىم عاغلىمىن سهولرىنه.

گوناهىم چوخ اولوب اوزوم بيلهنى
 كۆنولسوز ايشه من آرتىق دالميشام.
 قالميشام بيرده كى، كۆنولسوز ايشدن
 كۆنوللى ايشه چوخ جزا آلميشام.

نييه بئله اولوب بيلميرهه هله؛
 حياتين غريبه دويونلرى وار.
 بيرينى آچيرسان، يارانير يوزى
 قارشىق بو يوللار هاچان قورتارار؟

يوللار باشدان-باشا دويون-دويوندى؛
 بودا بير دويوندى يازىليب بئله.
 عاغلىم نه دئيرسه قوى دئسين، آنجاق؛
 كۆنلوم راضى دئيبيل اونولا هله.

دنيا دكى ميدانى
اودا كى، ھئچە بىنددى.
بىز او ھئچىن ايچىندە.
ايندى آختار اۋزونى،
دانىشديغىن سۋزونى،
بو اۋلچى، بو بىچىمدە.

كۆنلومله صحبت

بودا بىر عۆموردى، ياشادىق بئله؛
ياش اوسته ياش گلدى مَندن خَبرسىز.
بو يوللار باشىما نه گتيردىسه
گتيردى اى كۆنول سَندن خَبرسىز.

باخما گىلئى لَنيب قوجالدىم دَسم؛
ياكى، لووغالانيب اوجالدىم دَسم.
سَنين آتشىندن گوج آلان سَسم؛
دوماندان خَبرسىز، چَندن خبرسىز.

چكىره م يوكومى آللى يه ياخين؛
بَللى اولمايانا، بَللى يه ياخين.
دَملى اولماسادا، غملى يه ياخين؛
ساچىما گور ياغان دَندن خبرسىز.

مَنى او قدرده قوجا سانما يوخ!
اؤتن گونه، آيا، ايله يانما يوخ.
مَنى ده سئونلر واردى، آما يوخ!
مَندن خبرسىزدى، سَندن خبرسىز.

خَزَر سَاحِيلِيْنْدَه

بودور،
ساحيلده يم،
ايچيمده دَنِيْز؛
او دَنِيْز اوره ييم،
توفان قوپارير.
آرا بير تُوخونور آياقلارِما
حَلِيْمَلِيْك اوستاسى خَزَرِيْم، منى -
توفاندىن ساحيله چَكِيْب آپارير.

ایستهرهه

بیر باهار هاواسی کۆنلومه دوشوب؛
 بیر باهار یاغیشی یاغسین ایستهرهه.
 یئنی دن بولاقلار چاغلایین آخسین
 یئنی دن شیمشکلر چاخسین ایستهرهه.

یئنی دن کۆنلومی اؤخشاسین باهار؛
 یئنی دن مَسْت اُولوم، سَرَبَسْت اُولوم مَن.
 هر نه وار گۆزومه گۆزهل گۆرونسون
 گۆزهللیک ایچینده سرمست اُولوم مَن.

یئنی دن گول آچسین باغچالار، باغلار؛
 یئنی دن مَن قوناق اُولوم بوزگوشا.
 یئنی دن روحومی اؤخشاسین باهار
 یوروویوم نغمه لر مَن قوشا-قوشا.

نه روحوم اینجی سین، نه کۆنلوم سوسسون؛
 قانادلی قوش کیمی قانادلانیم مَن.
 او شاقراق ایلیریم، گومراه ایلیریم _
 گئتسه ده، ساچیم دؤلسادا آغ دن...

بیر باهار هاواسی کۆنلومه دوشوب؛
 بیر باهار یاغیشی یاغسین ایستهرهه.
 یئنی دن بولاقلار چاغلایین آخسین
 یئنی دن شیمشکلر چاخسین ایستهرهه.

خَزَر دَئِيه آخِيرَام

بولاق ايديم آخيرديم،
 قوجامان قافلانتى نين
 دوشوندىن گيله-گيله.
 نه تله سن بير يئريم،
 نه گنجيكن منزىليم.
 دوشونموردوم هارادا
 نه يه قوشماغىمى.
 ياكى، يولومون اوسته،
 جادار-جادار توپراغين،
 مين قاتى نين بيرينده
 هارداسا باتماغىمى...

گون اۋتدى كئچدى زامان؛
 آخىب آخىب قووشدوم
 قىزىل اوزن چايينا.
 آخىب آخىب قارىشديم
 نئچه چاي هاراينا.

ايندى آراز هۆسلى،
 قيزيل اوزن نَفَسلى،
 دايانمادان آخیرام.
 داها او قافلانتى دان
 آخان بولاق دئيىلم؛
 گئت - گنده ديشيره م.
 چای اولماق ايسته ميرهم،
 نه تله سمه ين يئریم؛
 نه ده بو يوللار بويى
 گنجيکمه ين منزىليم.
 آخيب دورمادان دنيز
 اولماغيما باخیرام؛
 خَزَر دئيه آخیرام.

پاييىزى حسّاندىب دوشونن كيمي،
 گۈزوم دە جانلانير سارى يارپاقلار.
 اورەكده باھارسا نە وار پاييىزا،
 اورەيىن اۋزونده سارى يارپاق وار.
 آغاج ياشىللىغى،
 اورەك آللىغى،
 بيري سارالاندا بيريده سۇلور.
 آغاجدان اورەيە، ياكى، عكسىنە،
 دئبيرم اولمايا گيزلى يول اولور؟

ناغیل اولماق ایستهره

هر کس اولور،

یئنیدن _

او قاییدیر دنیايا؛

آغاج بلکه،

چیچک بلکه،

انسان بلکه،

ناغیل بلکه؛

هئی سایدیلار،

دئدیلهر.

اگر منده بیر زامان،

قاییداسی اولارام؛

قویون دئییم ایندی دَن،

اۋزوم دئییم نَجَه مَن

قاییتماق ایسته بیرهم؛

بو دنیانی یئنی دن

یاشاماق ایسته بیرهم.

اگر منده بیر زامان،

قاییداسی اولارام

ایسته بیرهم اوئی مَن

ناغیل کیمی قاییدیم

اوره کلرده دئییرهم.

يۇخسا بېردە يئنى دن،
 بۇ دىيانى تىكراراً
 ياشاماق اىستەمىرەم.
 بېردە كى، مەن اۋزومى -
 اونودوب باشقا جورده
 قايتماق اىستەمىرەم.
 اكر منده بېر زامان،
 قايداسى اولارام،
 اىستەبىرەم اونى مەن
 ناغىل كىمى قايدىم؛
 اوزاقدا او قايداكى شكىل تىك،
 ائله دوزى اونون تىك
 مەن قايتماق اىستەرەم
 ناغىل اولماق اىستەرەم
 سۆزوم بۇيدا بېر ناغىل؛
 اۋزوم بۇيدا بېر ناغىل!

بودا بئله ناغیلدی

یغیلانلار داغیلدی؛
بیر یولدان نئچه یولا.
عاغلیمیز اول-اولا.

باخیرام اورا بورا،
عینی اوزلر گورورم؛
عینی گوزلر گورورم.

ھارداسا بیر زامانلار،
گئدردیلر قول-قولا
نئچه یولدان بیر یولا.

یغیلانلار داغیلدی؛
نه ایز قالدی، نه نیشان،
من ده ناغیل دانیشان.

يئنه ده بير فيكير گليب باشيما؛

يئنه ده اميدله ياشيماچيام.

تكي اميد آرزو دونى گئيمه سين

من اونى ايناملا داشيماچيام.

بير باشا اوزانان بو يورغون يولون

بير گون چاتاجيام يول آيريجينا.

باخ اوندا بيليرم قوشولاجيام

بو يولون ملتلى بول آيريجينا.

اوندا دورغونلوقدان چيخاجيام من؛

اوندا قالماياچاق شبهه م، تشويشيم.

ملت يولى اولسا يولوم بيليره م

ياغ كيمي گندجك منيم هر ايشيم.

گئنيش آچيق يولدى ملتين يولى؛

تك منيم دئييل كى، من دئين اولسون.

وطن بويدا يولدى ملتين يولى

تك سنين دئييل كى، سن دئين اولسون

بير باشا اوزانان بو يورغون يولون

بير گون چاتاجيام يول آيريجينا.

باخ اوندا بيليرم قوشولاجيام

بو يولون ملتلى بول آيريجينا.

سوزگون بىر باخيشا تامارزى كىمى،
 كۆنول ايسته ييمه تامارزى قالديم.
 اليمه دوشمه ين مين آرزو كىمى،
 دۆزدوم، من دۆزومدن تسلىي آلديم.

كىمسه دوشونمه دى اورهك آغرىمى،
 قوروقدا ساخلاديم اونى اۆزوم چون.
 شيرين سۆز دئمه خوش سۆز يازماغا
 عذابلار چكيشم هر بىر سۆزوم چون.

بعضاً سؤيله ديلىر خوش احوالينا،
 اوزاقدىر دنيانين درديندن بوكى.
 لاقيدلىك جنايت ساييلير سادا
 قسمتيم اولايدي بىر گونلوك تكى.

بىرجه گون گزئيدىم دردسىز، كدرسىز؛
 من ده نه وئجيمه دئيه بيلئيدىم.
 نه اولار، بىرجه گون بعضيلر كىمى
 اوره ييم دولوسى گوله بيلئيدىم.

بیرجە گون لاپ اۇنلار دئین اولایدیم؛
 درد کدر قسمتیم اولمایایدی کاش.
 عۆمورلوک پایما دوشمه یین نه وار،
 بیرجە گون قسمتیم اولایدی قارداش!

لاکید دولانایدیم، لاقید گزئیدیم؛
 دنیانین دردیندن، غمیندن اوزاق.
 هله کی گزیریک، هله کی آنجاق
 دنیانین شیپ-شیرین دمیندن اوزاق.

امید رؤیا دئییل

اؤتدی جاوانلیغیم قالدی آرخادا؛
 ایندی آهیللیغیم اؤتور آن با آن.
 گؤره سن نه سایاق یاشایاجیام
 صاباح قوجالیغیم یئتیشن زامان.

بوش قالدی آللریم جاوانلیق اؤتدی؛
 ایندی آهیللیغیم اونا تن گلیر.
 گونشین ضیاسی چکیلن زامان
 قاشا قیروو دوشور، گؤزه چن گلیر.

کئچیر گنجلی بيم تک آهیللیغیم دا؛
 گؤره سن قوجالیق نجه گله جک؟
 بیرجه بیر امیدیم، بیر گومانیم وار
 بلکه قالان عؤمور وئجه گله جک.

امید رؤیا دئییل، خولیا دئییل، یوخ!
 او گون هاردان اولسا گله جک بیر گون.
 شبهه سیز بیلیرم آچیلجاجدی
 امید یوللارینا وورولان دیون!

ايناناندا دنيايا

انسان تاپار اۋزۇنى
ايناناندا دنيايا.
سئچر يۇلۇن دوزۇنى
ايناناندا دنيايا.

كۆمەيى دىر اينانماق
بونا نئجه يوبانماق.
انسان يۇلۇدى يانماق
ايناناندا دنيايا.

چتېندە باش گىرلەمك،
ايرى يە دوز سۇيلەمك،
نئجه اولار دئە گۆرك
ايناناندا دنيايا.

دَرمانی بُول، دَردی بُول!
 كۆنول سنده آییق اُول
 گرهبیندی هانسی یول؟
 ایناناندا دنیايا.

یول وار دینجدی، هاماردی،
 كئچیلمز یولدا واردی.
 هانسی گور دوز اولاردی
 ایناناندا دنیايا.

قیمتینی بیلمه دن
 یولچی اولما دینجه سن!
 كئچیلمز دن كئچرسن
 ایناناندا دنیايا.

گرهبیندی اینانماق
 اونا نجه یوبانماق.
 انسان یولودی یانماق
 ایناناندا دنیايا.

زورلا يازاندا

اۋلدوردوم اۋزومى بىر مصراع اوچون؛
 گۆتوردوم ائله بىل قورغوشون يوكى.
 اورەكدن گلندە آخىر ياغ كىمى
 تَرپتمىر يئرىندىن او توكدىن-توكى.

فېكىر، قلم، كاغىذ

اوچى بىرلەشپىر؛

كۆنولسوز،

اۋزونوز سئچىنىز ايشى.

ساناسان «مشدعباد» اولورام آرتىق،

گلېن، قىز يئرىنە چىخاجاق كىشى.

اینانماق آن چتین؛ اینانماق آسان.
اینانماق گۆرورسن گۆزدن یول تاپیر.
سینماق بیر لشگره اینانماق چتین؛
اینانماق گۆرورسن سۆزدن یول تاپیر.

كۆنلوم

ساكت دَنيز دئيبيل او،
 ميشيل-ميشيل اويوسون.
 اۇد اوستونده سو دئيبيل،
 اوجاق سۇنسه سۇيوسون.

او كپنك قانادلى،
 چيچكلر تك اينجه دى.
 بيرجه گۆز قيرپيميندا
 سئوگيني گۆرونجه دى؛
 كۆنلوم اورەييم جه دى.

قار ياغدى داغلارا،
مَن سيخيلماديم.
دئديم كى، بوقيشين باھارى واردى.
دَن دوشدى ساچيما،
سيخيلديم،
آخى
آزالمير، چوخالير نئچه باھاردى.
قالميشام،
بيلميرم بو نئجه قاردى.

ھەر نہ ذرّہ-ذرّہ يئتيشمەديسە
پير ائديب اليمدن تئز اوچدى منيم.
يۇلى آدديم-آدديم گئتمەدييىمدن
باشيما اويونلار او آچدى منيم.

ھئچ نہ بيردن-بيرە دوشمورموش آلە؛
يۇخسا دئسك دوشور سھويميزدى او.
انسان ياواش-ياواش دۇلور كامالا
يۇخسا كامال دئييل، جھليميزدى او.

وٲن قاريش-قاريش وٲن اولماسا
بللىدى، گئت-گئدە اونودۇلورموش.
سئويب-سئويلمكلە اورەك وورماسا
خزان ووران باغ تك غمە دۇلورموش.

دنيذ داملا-داملا دنيذ اولۇبدى؛
بو سۇزون عكسيئە كيميئ سۇزى وار؟
ياغيش چيكلە-چيكلە ياغير سئل اولور؛
گۇرر مطلق كيميئ گۇرر گۇزى وار.

ھەر نہ ذرّہ ذرّہ يئتيشمەديسە
پير ائديب اليمدن تئز اوچدى منيم.
يۇلى آدديم-آدديم گئتمەدييىمدن
باشيما اويونلار او آچدى منيم.

ساچىما دوشدى دَن...

بىلمەدیم نەدن؛

اۆزومه سۆيلىدیم بو قوجالىقدى.

فېكىردە چوڭ گزىب، دئدىم كى، نە غم!

ائىل ايچرە قوجالىق لاپ اوجالىقدى

اورەك گولومسەدى،

اورەك سۆيلىدى:

قوجالىق اوجالىق گتيرير اگر

چوڭى وار ياشينين قوجالىغيندان

بلكە دە ساچينين دوم آغليغيندان

باشى يئددى قاتلى گۆيلره دەير

فېكىر سوسدى،

داها اورەك دىنمەدى

سانمايين ساچىما دَن داي ائئمەدى

بیر دۈست اۋجاغی نین کۆزوندن اومدوم؛
 اورە بیم باشلادی اونی دئیوندى.
 اۇنون یوکسەلیشى اونا یاراشیق،
 منیم او اولماغیم گولونج گۆروندى.

دوشوندوم اۋزومدە بئله اولمانی،
 شعریمدە، اۋزومدن سۆزوم اولاندا.
 سوزگون بیر باخیشجا،
 یولدا جیغیرجا
 من گولونج اولمورام اۋزوم اولاندا.

كۆنلوم اميد شَهريدى؛
 اميدسىزلر نئيلر منه؟!
 اميدىمى ياد قيرانماز،
 نئيلهسه دۇست ائيلر منه.

مَحبتده اوشاق اولسام،
 نقرتده مودريك قوجايام.
 سۆزى ملّتن آلَميشام،
 سۆزده اۆزومدن اوجايام.

منيم اميد شَهريمده،
 هر نهيين اۆز يئرى واردى.
 كاش ائله بير گون گلئيدى،
 شَهريم نقرتسىز اولايدي.



.....

.....

.....

.....

.....

.....

.....

.....

.....

.....

.....

.....

.....

.....

.....

.....



.....

.....

.....

.....

.....

.....

.....

.....

.....

.....

.....

.....

.....

.....

.....

.....

اوشاقلار

باغچاسیندا

فۇش گونە چىفسىن

اىللىر، اوبالار.

صله سس وئىرىن

سىزده اوشاقلار.

قارا گونون عؤمری آز اولار

آغاجلارین آتہیی
 یارپاقلارلا دؤلدولار.
 آیاقلارین آلتیندا
 قالیب خزه اولدولار.

یاغدی پاییز یاغیشی،
 چیمیزدیردی داغلاری،
 آل آتیپ یارپاقلارا،
 لوت ائلهدی باغلاری.

هله گؤزهل طبیعت
 شَن حیاتدان دؤیمامیش؛
 سازاق آسیب سؤیلهدی:
 بودور گلیر قارا قیش.

فقط نئجه گلسه ده
قیش، ابدی قالانماز.
اوچ آیلیقدی دؤورانی،
دائیم حاکیم اولانماز.

اُون ایکی آیدان فقط
قیشین اوچ آی عؤمری وار.
قارا گونلرین عؤمری
هامی بیلیر آز اولار.

صلحه سَس وئرین

باغچادا، باغدا
اُوخور بولبوللر
یاشیل بوداغدا
اُویناییر گوللر.

اُوینایاق، گولک
اُوخویاق غَمسیز.
داها جَنگدن
قالماسین بیر ایز.

خوش گونه چیخسین
ائلر، اوبالار.
صلحه سَس وئرین
سیزده اوشاقلار.

گۆزەل قیز

مَن بیر گۆزەل قیزام کی،
 سَحَر تئزدن دورارام.
 اؤز آلیمی، اوزومی
 اؤروم هر گون یووارام.

آدیم دوشوب دیلله،
 گۆزەل قیزام، گۆزەل قیز.
 یاراشیرام ائلله،
 گۆزەل قیزام، گۆزەل قیز.

قوناق گتتسک بیر یئره
 هئج نه یه آل وورمارام.
 اجازه سیز آنامدان
 مَن یئریمدن دورمارام.

اینجیتمهرم آنامی،
 یالان دانیشمارام مَن.
 بؤبوکلرین ایشینه
 گیریب، قاریشمارام مَن.

آدیم دوشوب دیلله،
 گۆزەل قیزام، گۆزەل قیز.
 یاراشیرام ائلله،
 گۆزەل قیزام، گۆزەل قیز.

صلح ایسته بیر اوشاقلار

چیخار گونش، داغلارین
 سال بوزلاری آرییر.
 یاز نَفَسی تُوپراغین
 لاپ جانینا یئریر.

گول آچار باغچا-باغلار،
 تزه له نر هاوالار.
 هله گؤرون بو حالدا،
 داها نهلر نه اولار.

باغچا-باغدا بولبوللر،
 جهجه ووروب اوخویار.
 هر آغاجین باشیندا،
 بیر قوش یووا توخویار.

قُول چیرماییب اُوغلانلار
 بتلر باغی، باغچانی.
 قیزلار سیلر، تَمیزلر
 آتیشقانی، تاغچانی.

بایرام گلر ائلره،
 کوسنلرده باریشار.
 اوشاقلارین هامیسی
 بیر-بیرینه قاریشار.

یاددان چیخار کدرلر
 شاقراق گولرلر اُونلار.
 باخ بئله گون آرزولار
 منجه بوتون اوشاقلار.

کاش بئله گونلر بیزیم
 دونیامیزدا چوخ اولسون.
 داوا، کوسگی سالانلار
 یئر اوزوندن یوخ اولسون.

انسانلارین قَلبینه
 کاش سالایدی صلح ایشیق.
 داعوا نهدی انسانلار
 گۆزهل اولور باریشیق.

گَلین تۆکک آتکدن
 بو گوندن جَنگین داشین.
 دئییک نییه اؤلدورسون-
 آخی قاداش قارداشین.

سیزده فیکیرلشین بیر
 سیز ای داعوا سالانلار.
 بس دیر داها سیز الله!
 صلح ایسته بیر اوشاقلار،
 صلح ایسته بیر اوشاقلار.

سئوال؟

بیر سئوالیم وار،
سیزه اوشاقلار.
فیکیر وئرسه نيز،
جاواب تاپیلار.

دؤرد فصلی واردی،
هر ایلین آنجاق.
مَن دئین فصیل،
اولار آغ-آپاق .

او گئدن کیمی،
تزه ایل گلر؛
بو فصلین آدین
گؤره ک کیم بیلر؟

واختین قیمتی

یازدا یاغدی گور یاغیش،
 طبیعتی اویاتدی.
 دئدیم یاغ کی، یاغماغین
 طبیعته حیاندی...

پاییزدی، یاغیر یاغیش؛
 طبیعتی گور ایندی.
 تک-بیر قالان ساپ-ساری
 یارپاقلاردا تۆکولدی.

گوره سن بو تضاددین،
 نه لر اولوب علّتی؟
 یاغیش ائله یاغیشدی،
 بیردیر اونون خلقتی.

منجه دوز آختاریلسا،
 اونا جاواب تاپیلار.
 آخی نه وار پاییزدا
 یاداکی، بو یازدا وار.

یوخسا یاغیش اولانماز
 بو تضاددین علّتی.
 منجه هر ایش بئله دی؛
 واختیندادی قیمتی.

مَستان پیشیک

مَستان پیشیک داغیتدی،
 سُفره میزدن چۆره بی.
 احسان گلدی یئمه یه،
 صاف گۆرمه دی هئچ نه بی.

اوطاق باشدان آیاغا،
 اولموشدی نارین چۆره ک.
 او دورمادان چاغیردی :
 تئز اول آنا، گل گۆره ک!

چوخ چکمه دی آناسی،
 ایشینی قویدی گلدی.
 احسان کیمی آنادا
 گلدی باخدی نه گۆردی؟

او دا گیرجک اوطاغا،
 ائله ایشه مات قالدی.
 درحال مَستان قیزیندان
 تله سیک خبر آلدی.

مَستان قیزیم سؤیله بیر
 بو نه ایشدی گۆروبسن؟
 بئله ایشلر پیس ایشدی،
 بَس نه قدر دئییم من!

اُوندا آتی داغیتدین،
 آلیمیز چیخدی بوْشا.
 دونن سوی جالاتدین،
 اوطاغا باشدان باشا.

بودور یئنه آی قیزیم،
 بولود کیمی دولوبسان.
 والله من کی، قالمیشام،
 بلکه پیشیک اولوبسان.

طبیعتین قوینونا سَفر

نَسیم آسدی بو سحر؛
 هاوا آچیلدی بیر آز.
 نه گۆزلمیش، نه قشنگ
 بو ایل، بو باهار، بو یاز.

گونشین شفقلىرى
 داغلارین اوسته قوندى.
 گول-چیچه بین قوخوسی
 نفیسدن نفیس اولدی.

کامالا دولور انسان
 حیاتدان ذوق آلاندا.
 حیات تک گۆزه‌للیشیر
 یاشام ساغلام اولاندا.

روحا روحدی، جانا جان
 حیاتی جانان سنومک.
 پارلادیقجا پارلایار
 بو روح، بو جان، بو ایستک.

سئوگیله ووران اورهک
 رحیملی دی، رحیمدی.
 مَحبت اؤزی بویدا
 اینام، ایمان و دیندی.

بئله عؤمور سورمه یه
 رضاسی کیمین اولماز؟
 بئله اولسا شهبه سیز
 کین، کیدورت تاپیلماز.

سئونلرین دنیاسی
 گول-چیچکدی، گولشندی.
 صاباها دؤغری یوللار
 ایشیقلی دی، روشن دی.

سئوگیسیز عؤمور کی، وار
 قانادسیز قوشا بنزر.
 مَحبتسیز انسانین
 اوره یی داشا بنزر.

افسانه سانیلما سین
 بو عؤمور-گون، بو حیات.
 ایشیقدان ایشیق اولور
 سئوگی دؤلی کائینات.

تَنبِل اُوْغْلان

مَن بیر اُوْغْلان تانییرام
قونشوموزدی هاچاندی.
اُونون عیبی بودورکی،
مدرسه دن قاچاندی.

اوشاقلارلا همیشه
دالاشماقدی پشه سی.
آما درسه، مشقه یوخ
اُونون اصلا هوه سی.

مدرسه ده، کلاسدا
اوتورماغا شوقی یوخ.
سوروشاندا علتین
دئیبیر: درسین ذوقی یوخ.

سَحر دن آخشاما جان
او کوچه ده ویرنیخار.
والله دئین اولماسا
شامیندا اورد ا تیخار.

سیزجه دئیین اوشاقلار
بو ایش عاغیللی ایشدی؟
منجه کی، یوخ، بو ایشلر
تَنبِل لره وَر دیشدی.

بیر پیشی ییم وار

بیر پیشی ییم وار
 رنگی قاپ-قارا.
 دوشور دالیمجا،
 گئدیرم هارا.

دئیرهم بو ایل
 درسه گئندنه؛
 منله گل گئندهک
 کلاسا سن ده.

بؤیوک قارداشیم
 دئیرکی، اولماز.
 اودا کی، منسیز
 تک ائوده قالماز.

قالمیشام ایندی-
 نه ائدیم بونا.
 گرهک تاپشیرام
 اونى باجیما.

من گله نه دک
 اونى ساخلا سین؛
 اودا تک-تنها
 ائوده قالماسین.

اوخوجولارا مراجعت

ای عزیز اوخوجوم باغیشلا منی؛
 بلکه هئچ کؤنلونه یاتمادی شعریم.
 سنین خیال آدلی علوی دنیانا،
 بلکه قانادلانیب چاتمادی شعریم.

بلکه تاپمامیسان آختاردیغینی؛
 بلکه ایسته‌دی‌یین اولانمیشام.
 بلکه ده محبت، سئومک نامینه،
 گزدی‌یین شعرى من یازانمیشام.

بلکه ده نه بیلیم خوشونا گلیب؛
 آخی اوچ-دؤرد ساعات سنی یورموشام.
 کؤبود اولوبسادا هر مصراع باشی،
 اورهک خرجه‌میشم، کؤنول قویموشام.

هر نه‌یی یازمیشام کؤنول نامینه،
 کؤنولسوز یازمادیم بیر شعر، آنجاق-
 اودور کی، دئییره‌م امیدیم وار کی،
 اولان نقصانلاریم باغیشلاناجاق.

سون سۆز

سَعِيد قافلانا مصاحبه

۱- ائله سانيريق كى ميانانين، ادبى گليشمه سينده ميانالى عليرضايلا سيز آن باشدان بو يولى بير گه آددىملا ميسينيز. هر نهدن اونجه بو ادبى عؤمور حاقيندا ايستردىك سيزدن ائشيدىدهك.

= ميانالى عليرضايلا من چوخ ايللردن قاباق، دئمك اولار بيرينجى صينف كلاسلا ريندان تانيش اولموشوق. او گونلردن برى يئنى يئتمه ليك گونلر ينى ده، برابر باشا وورموشوق. گنج ياشلار يميزدا بير بير يميزله ياخيندان امكداشليق ائتميشيك. من تبريز دانشگاهيندا اوخودوغوم زامانلار، ميانالى عليرضانين شعرلرى ايله تانيش اولموشام.

۲- بو اوزون ايللر آرخاسيندا قالان ادبى عؤمور حاقيندا نه دئيه بيلرسينيز؟

= من هر زامان عليرضانى چوخ چاليشقان، داوامجىل دورمادان ادبى ايشلرده، شاعيرلرين شعرلرينى توپلايب چاپا وئرمكده، ادبى دَرَنكلرده اولماقدا، شاعيرلره ياخين امكداشليق ائتمكده گؤرموشم. او آذربايجاندا ياراناق دَرَنكلرده ياخيندان اشتراك ائدير، شاعيرلرين رَغبتينى قازانميشدير.

علیرضا نچہ ایللر میانادان اوزاق خارجی اؤلکه لرده یاشاییدیر، اونون تزه چایا وئرلن بو کیتاییندا، غربت ده یارانان حسرتلر، آغیر کئچن گونلر، وپندن اوزاق وپن دوپغولاری، وپن مایالی شعرلری اوزونی اولدوغی کیمی تام آیدنلیغیلا گؤستریر. هئچ زامان او وپنی یاددان چیخارمایب نجه کی دئیر:

انسان کیمی یاشاساق،

گؤزلله شر دنیا میز؛

باشقا بیر شعرینده ایسه فیکرینی بئله ایضاح ائدیر:

دونه نیم سن، بو گونوم سن، صاباحیم سنسن

گؤزهل دیار، آذربایجانیم...

او صاف اوره کلی، اینجه روحلی بیر شاعیردیر، اونون بو اثری ده باشقا اثرلری کیمی انسانین روحونی اوخشاییر، بیزله ایسه حیاتین بیزدن اوزاق اولان و تجربه اولونمایان دیگر یونلرینی ده آچیر گؤستریر.

۳- سیزی بیر-بیرینیزه باغلیان مفکوره نه دی؟

= بیزی بیر-بیریمیزه باغلیان فیکیر، وپن پرورلیک، اونون قایغیسینی چکمک، خالقیمیزین ادبی ارثینی قورویوب ساخلماق، یئنی یئتمه لره ایسه باشاردیغیمیز قدر، بو یولدا کمک اولماق دیر.

۴- میانالی علیرضانین شعرلری حاقیندا فیکیرینیز؟

علیرضانین شعر دونیاسی چوخ تمیز، چوخ ایستی، یوموشاق، عینی زاماندا درین، تاثیر ائدیجی قدرتی وار. وپن پرورلیک علیرضا

شعرلرينين تَمَلينى تشكىل ائدير. هئچ زامان او تاپشيريقتلا قلمى اليه
آلماييب. او بورا قدر شعر دنياميزا لكه سالماييب، اؤز دئدييي كيمي:
او آدام كي، آدامدى، گونده گيرمير مين دونا.

۵- ميانادان يول آلان بو ادبى عؤمرونوز هارالاردان كئچيب؟
= ميانادان يول آلان بيزيم ادبى عؤمروموز، چوخ آنيشلى، يوخوشلى
يوللاردان كئچيب اويرنديكلريميز اويرتديكلريميزدن قات-قات چوخ
اولوب. عليرضا بو يوللارين ائنيش يوخوشوندان اوغورلا كئچيب. اونون
ادبى اثرلرى بونلارى گؤستهرير.
مَن كيچيك، قيسا بو صحبتده، اونلارين هاميسيني دئيه بيلمهرم،
اوخوجولار منابعلره، مراجعت ائلمه ليديرلر.

۶- بو ادبى عؤمور، سيزى آذربايجان ادبياتينا نئجه باغلاييب ؟
منجه ادبى عؤمور، ادبى حيات، آذربايجانين تاريخينه، خصوصا اونون
مدنى تاريخينه باغلانماسا، او ادبى عؤمور اولاييلمز، بئله بير باغليلىق
ايسه عليرضانين شعرلرينده چوخ آچيق اوزونى گؤستهرير. شاعير اوزى
بير شعرينده اؤرنك اولسون دئيه بئله يازير:
شعريمين ماياسى و طندى، خالقدى
اونلاردى كؤمه ييم منيم دنيادا ...

۷- سيزدن اوزاقدا كئچن، غربت عؤمري ياشايان ميانالى عليرضا
ياراديجيليغيندا قاباريق، شه كيلده گؤرونون اونون غربت شعرلرينه
نئجه باخيرسينيز؟

= شېهەسىز دئمك اولار اونون غربت شعرلرى چوخ اورەك ياخان، چوخ جان يانديران شعرلردير. عليرضا بوتون غربت شعرلرينده وطندن يازيب، اونون غربتده بير آنى اولمايىبكى، وطنسىز كئچسين. بو توپلودا تقدیم اولان اونون غربت شعرلرى اوخوجودا تجروبه ائتمه ديبى بير عوموردن دانىشپير، اول بيلمزكى، او شعرلرى اوخويوب كدرلنمە يەسن، اول بيلمزكى، او شعرلرده عليرضانين نه قدر وطن پرورلى يىنى گوره بيلمە يەسن، اول بيلمزكى، ائشيه يوخ ايچينه گيزلى گيزلى آغلايان اورەك سيخىنتيلاريني ائشيمە يەسن. شاعير باخين كى، اوزى غربت هاواسىنى نه قدر تاثير ائديجى شكىلده سويلە يير:

هئچ نه يىن داماقدادى، داد اولمور،
كىمسە نين نئيله سه، آدى آد اولمور،
آدى اولانلارين آدى، ياد اولمور
غربتده بير شئى يوخ، وطن يئرینه.

۸- بيزه واخت آيبرديغينيزا گوره تشكر ائديرىك.
= ساغ اولون منده تشكر ائديرەم.

● از این شاعر، چاپ گردیده است:

بودا بیر عؤموردی - ۱۴۰۱

